


溪堂先生文集
七

5563.8
4266

v.7

共八





溪堂先生文集卷之十三

墓碣銘

弘文館副校理勿窩李公墓碣銘

並序

記昔壬辰疇睦陪王考進參先祖文忠公家廟之
侑時勿窩李公亦來相焉疇族叔鶴樓翁舉似公持
國哀謝閔僚事語我王考甚悉相與稱歎之不已
疇睦雖弱齡浚仰王考鶴翁之言嘗服公正禮確守
至今四十年不衰其胤子義興縣監能亨欲揭銘墓
道圖示久遠以疇睦知公詳奉誌狀屬之筆疇不敢
以孤陋辭荏苒數歲義興君遽不淑其弟能章再來

索人事愴然按狀公諱在直字養仲勿窩其號黃驪
氏也高麗鄉貢進士諱世貞爲始祖八 本朝至文
元公晦齋先生遂爲文獻大家文元孫諱宜潤號無
忝堂克紹家學於公間八代高祖諱誠中蔭仕宗簿
直長曾祖諱憲祖祖諱鼎廈世有隱德皆早世考諱
元祥號依隱文行重於士類蔭補 寢官連登司馬
文科未付職卒大臣白 上特 贈弘文修撰前妣
淑夫人延安李氏剛齋承延女奉朝賀靖僖公觀徵
后繼妣淑夫人聞韶金氏處士復運女大司諫邦杰
后並闡範聞公金氏出 純廟乙丑十二月十日公

生生質端重幼不妄戲七歲抽曾傳請教考公曰此
大人學非幼子讀對曰幼子終不爲大人乎考公大
期愛癸酉丁外憂持衰哭泣如成人以大夫人命就
從叔恥庵公岳祥學恥翁愍幼孤課不嚴公痛惕日
早進恥翁歎曰必成就丁亥翼廟代理憲廟誕
降秋登慶科公纔弱冠聞望藉蔚朝廷待以嶺中第
一流戊子隸槐院執贄謁吾王考江皋先生甚見獎
勉己丑冊王世孫翼廟命大臣極選耆德暨新
進文學士充宮官公與吾王考同被選拜講書院左
贊讀朝野榮之庚寅翼廟薨赴哭山陵右僚閔

公泰鏞見公衰升太廳屢言其改製至曰吾爲公備
公曰喪服豈嫌麗况旣服又奚改閔改容謝語于朝
曰李某真君子人辛卯拜侍講院說書丙申夏除
諫院正言憲府持平秋入瀛選九月拜修撰選知製
教冬赴純廟大祥班陞副校理丁酉三月兼修
實錄記注官公以久於京非其志且急於覲而史
事未竣長姪能玄適上庠待應榜呈由歸大夫夫人患
報至公兼程而還大夫夫人良已崔淑人遽歿公震撼
憂悴中感疾革執伯氏高城公手嗚咽曰弟以无
狀早科清銜已踰分矣死亦何恨但老慈在堂兄亦

老永爲不孝不弟之鬼語不及子女遂屬續四月二十三日也享年纔三十三公孝性天出蚤孤爲至痛忌日哀慕如袒括大夫人嚴有法度或不假辭色順志務爲悅大夫人曰吾於此兒言不笑不得九歲遭喪時寒冽弔者日至公爇數片瓦潛置伯公苦席下伯公覺而禁猶伺其出輒置庚辰伯公仕在京公纔過成童凡奉祭養親誠敬克至及其大闡榜隸攔入公方寢徐起應寢如故時大夫人任伯公禮山任所公帶榮來覲將還鄉伯公以官卒侈行盡辭之行李蕭然人以早科賀公曰菲才驟登兢懼居先其赴館

職也有以乞養言公曰爲親乞義無不可今人慣乞此吾所不屑洪承宣永觀語人曰李高城有泮村處子名其弟真兄之弟趙尚書秉鉉訪館直款甚以其家迎 侑簡速終不謝以趙方柄用也金相履喬過禮山謂伯公曰新進端重惟令季其見重如此日必蚤起靜坐讀朱書非是擾不掇有言旣科何讀公曰讀書只爲科第已乎凡此皆實行也葬杞溪縣之望峯里負西原崔淑人同竈淑人系出月城貞武公震立后成均生員祈永女有淑行生長豐亨女紅理貧家有裕不私已財事尊姑尊章甚得婦道有三男二

女男長卽能亨生員筮仕亦早歿人惜之次能章季
能亶弱冠早歿女長適柳道奭教官次朴海鎮二男
寂久次幼二女辛泳元次未笄能亨出三男俱幼能
章出能亶无育子能亨次子一男幼二女韓喜東張
志求道奭出一男泰東海鎮出嗚呼公以忠孝仁義
爲主本守經執禮爲道理早歲蜚英晉途方闢是宜
其中晚充實有德有業根柢乎士林冠冕乎朝端誠
乎人主澤流生民而風燭奄忽萬事成空嗚鑾佩玉
莫追遺響吁奈公邴然當世賢士大夫憐公之志行
而惜公之歿者猶且不少後日必有能闡揚其德美

者矣是爲銘銘曰

天眷大東昇以斯文文元之作厥有大源恪守遺緒
忝依相承於惟我公庭訓是膺蚤聞黃甲金馬玉堂
志篤秉禮廳麻方喪遠駕近稅俾遺後食百世之下
視此顯刻

節孝先生潘公墓碣銘

並序

嗚乎昔人有言孝者自行之源故周禮六行孝爲之
首而彝倫之道蓋莫先乎此矣然須是知所以爲孝
之道其必資於學乎國初有所謂節孝先生潘公諱
濡以孝聞醴泉邑誌曰公好讀書不事舉業父喪廬

墓泣血三年未嘗見齒旌閭碑陰記曰公永樂乙未
遭父喪廬墓一不歸家事死如生戊戌監司啓聞
旌表門閭成化丁酉特贈宣教郎烏原道察訪云
然則旌在太宗朝贈在成廟朝也後肅廟
庚子士林私謚曰節孝先生立書院於龍宮達溪醴
泉玉川以祠之張公緯恆曰圃隱鄭先生以廬墓終
制盛稱節孝潘公蒼雲權公斗經曰至性純孝根天
錫類南野朴公孫慶曰匪直懿質蓋資問學今距公
之世五百年矣其德善行業可記可傳者何限並皆
昧昧無徵而見於公私稱述者只此數款而已然之

數公世所稱立言君子而汙不至阿其好者也其言益信噫內篤於孝而外資於學近同於圃翁而遠慕乎高柴斯其所以有觀物公冲之承武趾聞也歟潘氏系出巨濟始祖岳仕麗以功封岐城君岐濟之一號也中世逸不傳皇考諱湧貴官典工總郎或云官判衛尉寺事云妣甫州林氏考妣合窆在醴泉郡之北龍山酉坐公葬在考妣墓左麓巽向環墓累石城以防火其來舊公前後三配金氏林氏孫氏墓並失所在後孫就公塋歲一同祀之公遺墟在金塘谷旌閭閣在高士坪銘曰

惟孝性也學以純惟學道也孝以真嗟惟節孝孝而
學百世雖遠後者覺嵬彼雙閭對里中川溪浩浩兩
祠崇凡有秉彝孰不親不朽者石舊而新

贈知印事藝文館直提學行春坊文學愚淵先

生金公墓碣銘

並序

崇禎乙亥十月二十日愚淵先生金公卒于京邸距
其生隆慶戊辰五月八日享年六十八桐溪鄭文簡
公以經筵官白上上命下三道監司沿路護送
異數也粵明年丙子三月七日葬于鍾山先兆次卯
向之原今二百二十有餘年尚未顯詩以刻之后孫

秉秀氏與從裔孫崑秀手狀屬疇睦曰墓不金石無以示諸後子其圖之疇睦辭不獲謹按狀而序之公諱知復字无悔一字守初愚淵其自號也金氏系出新羅神武王之後始封永山君子孫仍爲永山之金八本朝有諱宗敬官右贊成文平公乖厓守溫之祖也贊成四世有諱公著官同知中樞中廟丁卯請斬子光被袞貞誣極刑以死後明廟命雪其冤還職秩如初寔爲公高祖曾祖諱滋妣李氏有孝烈旌閭復戶祖諱彥健成均進士以厚德至行聞天植方直少所與惟盧蘇齋金后溪林葛川徐栗亭先

生而已學者稱芸亭先生

仁廟聞其孝特

贈殿

中以旌之考諱覺號石川當島夷難以義勝將大有
斬獲功官至軍資監正後以公原從勞 贈左承旨
妣商山金氏 贈淑夫人司成冲之女己卯賢良顯
之孫也公家世世以忠孝義烈內外脗光如此公幼
聰穎異常已知愛親敬兄甫成童執贄謁吾先祖文
忠公愚蒼諸老道義相與屏處山川書堂日有所程
不數年文行大進公自隆師親友以來專心於古人
所謂爲己之學凡讀經傳極意玩繹中涵外揉漸覺
日新雖以隨分循常不欲皎厲不得廢舉業志亦不

爲所奪也壬子中進士試光海政亂機穽四出世方
震惴不自立公遊太學爲嶺儒製請斬爾瞻疏語
凜然聞者吐舌癸亥 仁廟改王朝廷薦公除慶安
丞尋罷甲子春適舉兵反 上南狩公在鄉里聞變
急與蒼石召兵募糧暨兵事集賊平旋 除造紙別
提是秋擢增廣文科衆喜得人乙丑例陞 國子典
籍轉佐秋曹丙寅移騎省丁卯弘立以虜兵大舉入
寇至平山張旅軒先生承 命號召公暨蒼翁李敬
亭民戍李浣石彥英激勸後先將赴義三月和事成
命罷兵移春曹陞正騎曹戊辰連拜太僕正春坊

文學憲府掌令己巳冬出永川爲政專務寬簡不以
剔校爲名吏民俱便乙亥正司道請告歸七月哭長
子八月授密陽府使入都才 肅謝疾作遞轉司藝
疾欲遂不起公臨化吟七絕寄桐溪曰四大由來亦
假成一番生死不須驚但願相公爭致力好輸吾骨
到先塋蓋達死生之原悼松楸之隔而丁寧致意於
平昔知心之契者足以驗公之所學之正而其際亦
可見嗚呼悲夫公之學以灑掃應對爲階梯愛敬隆
親爲歸宿充養有道體用兼備一從小學中爲之準
則而但不求人知亦不之自處不喜空言惟務踏著

實地故壬子之疏甲丁之倡雖其殉國未就顧其
義分常盡亦不以冗官末仕或忽惓惓忠愛之心七
旬猷畝堂堂經濟之材十年郎署隨其所遇安之若
素而人不見其幾微之形於外自非樂天知命之真
有所得安能不愠不尤如是惜乎蒼石先生書石川
先生碣曰子某有雋望處從班而盡職事畀郡節而
務字牧斯言也盡之矣不佞何敢贅公之歿也襄事
諸具皆京外朋知所經紀輓誄諸作多朝廷鉅公而
桐翁輓一篇有曰文場早歲許相知淡水交情老不
衰我愛君資端且厚君憐我性朴而癡連床夜雨論

心處斫脰朝霜把酒時臨終詩語誠非意迴觀松邱
是聖慈桐翁之漢山成就在於公歿之翌年則丁
卯以後北憂之朝夕不保者將無日而不然矣中夜
風雨憂心忡忡則慷慨論懷顧何嘗不在於是耶畢
竟公不及而桐翁當之亦豈非命也所著詩文俱燼
逸所餘只若干冲澹可傳配淑夫人管山全氏直長
漑之女先公卒葬同原異壙有二男長遙進士次達
司寶僉正 贈戶參進士生一男三女男世翼 禧
陵參奉女長學諭李在容次裴世安嚴恆耆參判生
一男始振同中樞以忠孝 贈判書參奉生二男梓

哲判書生一男鼎夏繕工奉事孝 贈持平玄孫以下不盡錄後十四年戊子以曾參昭武勳 贈公都承旨兼藝文直學 國家伸未用公之恨也銘曰

由學而知以歸之師躬行在斯小學攸基出手扶持將墜之彝奚整鼓麾風雨何辭山川不隳可質我詞
通政大夫司諫院大司諫孤岳先生南公墓碣

銘並序

顯肅之際人物號爲極盛而孤岳先生南公以孤直秉禮履經爲諸鉅公所推也後仍替凡公所樹立之章疏亦無收弃也然今小胥野人咸知公名姓傳誦

其所樹立其聲烈真不可誣矣噫其不浹於禮義而
有是哉公諱天漢字章子號孤岳南氏本英陽新羅
英毅公敏後入本朝諱敏生工曹參議高祖諱健
參奉曾祖諱應元贈僕正孝間旌祖諱隆達副
護軍贈左承旨號懶齋考諱礪贈戶曹參判妣
冶城宋氏察訪福基女萬曆丁未公生在幼端序
則見長愈騫浸灌以學乙丑遭外憂庚午成進士乙
酉釋褐丙戌選補權知承文院己丑爲春曹佐郎弟
苔巖公天澤聯登仕衆榮之庚寅出爲金城縣令壬
辰補居山丞丙申召爲持平疏辭陳民弊矯揉之方

丁酉拜正言忤時議出玄風移清道故嚴明民去思
庚子還正言壬寅爲持平日言事謬謬竟坐不悅者
家食有年庚戌居內憂甲寅肅廟初服以掌令召
至京師先是孝廟大喪主國禮者因四種之體
而不正定大妃服朞仁宣后喪遵前議降大
妃服大功顯廟因都公愼徵疏考禮大悟改定朞
未究奄陟方公遂疏論已亥誤禮又參告廟按律
啓議禮者抵罪國是以定時又有閔愼父廢疾其
祖死當世稱禮家者許愼代父斬證宋寧宗服議公
以爲天子國君之喪五服皆斬父雖在不嫌斬非卿

大夫士庶所敢爲慎陷於無父無君請正其罪以明
倫常 上以悛言正論 允之尋陞執義因超資入
銀臺拜同副俄遷大司諫丁巳陞左令戊午除工議
已未朝著頗不靖與習公辭歸鄉里庚申除戶議時
事大變舊交諸家慘罹禍黨人八矣遂絕仕進優遊
林垞癸亥爲騎議不赴丙寅六月初二日考終享年
八十葬葛羅山齊月洞坐甲原前媿安東權氏士人
宗善女合祔後媿丹陽禹氏察訪弘鼎女墓在公墓
後一男汝衡生員二女李蕢金聖重生員嗣男斗精
一女李萬容縣監李男後榮郡守後植金男龍欽斗

精子龍範龍範子亨龜亨龜子始淳其世適無佗支
裔始淳又無子今來乞銘之基榮嗣始淳者也公孝
友天得也事親以至行居官以茂績稱晚年林居伯
仲怡然浚得色斯之義靜者之趣云蓋其與人處溫
厚不見崖岸而遇事自立不爲威利屈常時恬嘿自
守至其爭論激昂人皆爲之動魄爲文得之經史辭
達爲宗尤長於論義理下是非而掌憲疏辭光明俊
偉動彈流轉有足以想見氣象言議之萬一矣惜乎
其遺書散落不傳然竊觀當日凡有所觸靡不糜爛
也之義也國統也人紀也天道之定矣待百年哉公

之做得斯義也實由秉禮履經上來茲可以諗來世
詎不肆歟疇睦先妣公之胤生員公增縣監李公曾
孫女也忝外雲末今於遺孫之屬以不朽事義不敢
以不嫻辭辭遂敘而銘之銘曰

遏密諒闇明明繼述典禮是正疇賴以悉惟時哲人
炳于經常霜簡日出言與道章喉司晉秩諫長推賢
名以義顯身用晦全我識公衷書之公阜笥佚奚論
乘煌則有

孝陵參奉秋潭盧公墓碣銘

並序

公諱士俄字德夫號秋潭盧氏系出豐川高麗國子

進士諱裕爲鼻祖高祖松齋諱叔全禮曹參判藝文
提學選清白曾祖諱盼藝文校理 贈都承旨祖信

古堂諱友明己卯名賢官寢郎

贈吏曹判書考敬

庵諱禧進士與成聽松爲道義交妣南原梁氏處士

應麒女嘉靖甲辰公生七歲遭外艱祖妣悶幼弱啖

以肉泣辭母夫人沈疴飭公身恆湯鑪畔泣禱瘳辛

巳丁內憂幾隕絕與仲兄弘窩公廬墓泣拜風雨不

廢啜粥菽不食菜果以畢喪氣猶全慮仲兄毀勸魚

肉味已爲兄暫勉雷震以母氏驚雖夜衰經伏墓泣

少遭伯公參判喪老采痛敬仲兄居間日夜對有故

曠簡訊續早孤爲至慟以事父事仲父王溪先生先生教方嚴學遂通其學究性理微奧晚來教授獎拔甚多朴龍湖文模吳愚湖長其尤也甲申與弘兄倣呂氏鄉約并鄉飲酒禮月朔講行一鄉賴之龍蛇難同兄倡義義聲大振難已不自伐愛泉石卜築濫溪上講學棲息於其中 朝廷以遺逸徵爲 孝陵參奉不就癸卯四月二十日考終壽六十七葬郡北黃澗亥坐原公稟高氣峻潛心自修於世間得喪泊如也養志事親禮法刑家守已簡而重接人和而嚴於鄉恂恂不苟同於族由由不睽乖爲學奮發超悟精

患力踐嘗警學者曰學貴自得非此易差事在勉強
非此難成詔子姪曰世之學者不知事親敬兄爲實
工夫遽向上搜天道之妙說性命之原此何學也公
與寒岡鄭先生同庚同志講學又同祭公文有交義
膠漆語卽其家世淵源朋友麗澤而可以得公之所
存矣噫以公之德之學卒窮落以終身不得一施於
用惜哉娶星州呂氏士人忠女著壺宜祔公墓二男
膺彤伯男亨遂亨會季男亨吉亨福曾玄以下不盡
錄今其八代孫光逸奉公狀北來四百里屬余以墓
道之銘不佞嘗讀豐川十世淵源錄敬重盧氏世德

今於公圖堅之辭何敢辭按狀至公敬學耆詔子姪
數語輒作而歎曰此正是敬內義外之實事如今人
欲學蓋於是爲實下手處是爲銘銘曰

猗嗟世懿有是哲言出行成總是實濫水秋月千古
澈不朽者在我銘質

嘉善大夫同知中樞府事叅議姜公墓碣銘並
序

我肅宗大王在位也朝局屢剝換遂至二十年閑達
閭茂之歲泉從舊其誣善類不復振以及 元陵之
世則益無以拔出於滔波劫燼之中而世名冑志

行才氣之出尋常者舉抱不遇之恨不佞讀晉陽姜
乘至畊隱公諱必龜遺事尤竊悲之公字禮卿畊隱
其號也姜姓遠有代序高句麗兵馬元帥以式爲始
祖歷羅麗簪組蟬嬭入本朝大提學通溪諱淮仲
大司諫甲子名人諱訶副提學笑庵諱士弼左承旨
菁川諱絳江原監司道村諱弘重最顯監司於公爲
高祖曾祖諱珪蔭仕咸興判官祖諱碩老蔭仕順興
府使考諱樞負士望早卒妣韓山李氏判官亥年女
壺宜稱肅廟甲子公生生質疑遠少績學爲文以
應科目綽如景廟壬寅唱廷試名隸槐院權知正

字間陞六爲騎省郎出知昌平縣政清吏民懷之未
瓜遞公世居京見世路艱曲挈家踰嶺僦屋星之西
郭季父寄軒翁學行爲士類重先寄漆之石田石於
星隔江公月候省講論訓子劭農爲事外此吟詩課
花也自南下夏不西口不置時政得失晚以大耄例
陞至嘉善付同樞 英廟癸未十月二十日卒享年
八十葬州西芝山巽向原嗚呼余於晉宗之乘而論
公之世重有所感慨焉于斯時也公與從父昆弟注
書必文慕軒必慎獻窩必慶宗叔菊圃樸並以詞垣
宿望黃甲魁名膺一時文明之會而文彩風流照映

國門之西宜其聯武廊廟冠冕衿紳精神朝廷之上
折衝封疆之外而顧高不過館閣下焉而淪於郎署
率皆擯棄於當路漂泊於滄桑矣又何可論道而經
邦奠業而遺後哉蓋嘗讀諸公唱酬之什調格孤高
音韻淒楚以曩日王謝家牀笏里珂之盛無不作杜
工部岷嶓江湖之口氣而卽其悼亡傷離之作一似
夫八哀北征之音何歟嗚呼惻矣嗣後玄仍零丁重
以喪禍荐剝家藏蕩佚公之事情苦無所尋逐而獨
於其父兄朋友之言而徵之寄翁曰一生用工無非
誠字又曰腳踏實地今世完人洪竹翁禹龜曰操履

端方機械不設又曰衡門之下雜賓不至權校理世
櫛曰當世搢紳當爲第一數公之言盡之矣配全州
李氏 大君某之後士人恆女甚得婦道有二男
二女男世王世瑾女李東陽洪長孫明欽趾欽思欽
伯房出祖欽季房出李子泰運洪子宗翰宗幹進士
女李日運文科承旨曾孫泰永浩永趾欽出而泰永
八爲伯父后思欽系子夔永祖欽系子禹永玄孫暉
潤馨泰永出潤馨又出爲浩永后暉子源熙壽睦曾
姑母公長孫婦也生晚從家庭聆公風範雅矣今於
潤馨氏銘墓之託義不可已謹取遺事而敘而銘之

銘曰

我分我修彼仇曷故既賦之盛反靳其遇玉珮琇琇
薄過其聲全而歸之君子曰貞

慕齋朴公墓碣銘並序

朴公諱頤字正叔天性至孝成童丁內憂善居喪考
公恐毀而心異之考公處立巖別築立巖距家遠公
間日省非惡風雨不廢考公問其勞命移居別築傍
誨甚勤給遺書亦多庚申外艱與伯公頴廬墓伯公
未練不勝喪公孤痛脾憾如不保服闋絕進取所居
山水佳處誅茅扁慕齋以寓終身慕臨忌啜魚果以

終月不以衰老怠始祖諱彥忱羅末封密城君爲貫
其後高麗文翼公諱孝臣忠肅公諱翊最顯忠肅入
我朝不仕於公爲五代祖高祖諱融天官郎號憂
堂曾祖諱乾奉事祖諱承元司直考諱河淡號逍遙
堂以行誼徵爲司評不就金三足郭警齋則其道
義交妣安東權氏司直穆女生正德戊寅卒萬
曆辛卯享年七十四葬郡北七葉洞亥坐原考公兆
後後以子貴推恩贈戶參配義興芮氏萬戶信忠
女賢淑著壺窻墓祔四男長慶傳縣監宣武功贈
兵判有男二珽奉事贈正郎璣出后次慶胤嘉善

宣武功 贈兵判有男一璘嘉善側室男球判官瑜
部將璘嘉善瓘判官璉次慶宣萬戶宣武功 贈左
承旨無後次慶俊系子璣僉樞曾玄多不錄嗟呼以
公之至孝純誠使之移之事君必能鞠躬盡瘁匡輔
國家而竟不遇而終豈非命耶然而諸子並出身
仕途效忠立功於龍蛇之亂者愈久而愈顯則其不
食之報可驗也八代孫光軾來請銘疇睦撮其行迹
書諸石爲後人式銘曰

父孝子忠一室並隆是以銘之百世之風

斗村李公墓碣銘並序

公姓李氏諱晚景字君珍興陽人始祖將軍諱陽升
仕高麗高宗朝禦契丹立殣將軍後五世有諱舒原
官議政府左贊成六世諱均寶文閣直提學月蒼先
生分系始此高祖諱云培號凌虛隱不顯以好學聞
曾祖諱蓋忠典樂正祖諱得封水部右侍郎考諱長
春京兆亞尹妣振威李氏貞夫人三世 貤贈以公
大耄進同樞推 恩也公以 肅廟庚午歲生以
英廟丙戌卒享年七十八葬本府水寒里甲坐公至
性天出惇朴無偽幼知事親爲大人異之自稍長至
老成凡於致養之方苟可以僂身適意靡不用極大

爲鄉里稱父高年病風痺甚須人爲轉側語且不了
不離側便旋起居親欲有爲而不能手指口語者必
諭其意無錯父嘗患炙雉積雪滿山公拓窗泣忽有
狗躑躅堂下若先導狀遂跟狗如一雉自投歸以供
又冬患魚斧剖前潭冰魚躍出長尺餘父喜鄉人爲
之設宴詩之知府朴師漢就第慰藉爲親廚畜一鷹
父歿放之不去公死鷹亦死公臨終戒其子曰人子
致養固常行夫孰無此心比見人家子孫往往以父
祖孝行張皇請褒有若効勞然甚不可也我死後如
有過情之舉汝豈非羞吾魄耶命持來記實卽燒之

其子因含憾在中不敢更述子孫寢而遠先世遺事
無由以詳今之所敘次乃梅厓李膺三處士爲嶺之
高士李剛齋承延吃吃說剛齋爲之傳極鄭重梅厓
自忠信人在所聞見之世 純廟丁亥士林謂公卓
行懿蹟不可使泯沒享于竹林書院侑享文卽吾王
考手製也王考曰通神之行剛齋曰至誠感神朱子
於小學特書王祥之事以垂示後世所以明夫天壤
間實有者感應之理也今於狗鷹魚雉之異也先輩
立言易可已也嗚呼臨終一言自非通明學識有道
君子者寧若是純且正哉公殆正終者耳獨惜夫家

屢回祿隻字不傳也公嫗南原梁氏漚女文襄公訥
齋誠之之後有壹宜生二男一女男長陽煥次陽遇
女河用楫陽煥三男尚坤尚益尚觀陽遇二男尚亨
尚瀋曾玄外裔不盡錄公五代孫炳烈奉其門父老
之命遠來屬不佞以麗牲之役不佞按狀而作而曰
公真可謂子者耳世間之不能自盡於子職者皆公
之罪人也不佞不文固不能顧不盡分又烏敢銘公
督以先故有難終辭謹序如右系之以銘銘曰

於乎此孝子斗村李公之藏戒之勿傷犯孝子不祥

鵲堂柳公墓碣銘

並序

公諱德龍字時見號鵲堂柳氏本文化人高麗大
丞車達爲鼻祖其後十二三世左贊成諱曼殊本
朝吏曹判書諱原之其鬼勳大烈銘彝鼎高祖諱洞
縣監曾祖添年禦侮祖諱玉男忠順衛考諱洪部將
妣河陽李氏忠武衛秀女嘉靖癸亥公生五歲誦
六甲知籌數七歲持冊請學學日進南冥先生聞而
奇之召見撫頂曰睂宇非凡才高可教教以小學自
是遂往來山海之門親炙觀感先生有疾公身湯鑪
畔易簣日先生顧河覺齋沆曰此兒必成就善獎進
做得吾鄉之顏子其後摳衣於覺齋之門覺齋愛其

志行妻以女母夫人病飮餌粥躬煎日夜嘗糞禱天
遭憂喪禮依家禮河氏未于歸病臨終請一識面設
公曰死可弔生不可面送一衫以襲其執禮如此壬
辰倭猝迫嚴君臨急公與姊妹冒刃衛父爭死賊亦
感動少緩公乃負親逃姊妹竟潔身死事聞並旌
累歲奔竄備涉險供親无闕龍繇一書不去手癸卯
丁嚴公憂哀毀展省墓祈寒盛暑日不廢服闋專意
學問不求聞達惟以一心師門爲歸宿地僑嘉之龍
亭卽南冥舊址也有時騎青牛或竹杖草屨春秋八
頭流謁德川院以寓慕鷦鷯小鳥也宜無以爲號是

鳥也棲不過碧桃一枝而其居隱其性潔物不得以
害之者也公之以此自況其意可見 長陵甲申正
月十八日考終壽八十二葬北山亭後巽坐原前媿
河氏无育繼媿密陽朴氏進士士廉女生一男暎漢
暎漢男拱辰拱斗拱日拱參曾玄以下不錄今其九
代孫宜斗北來三百里請公墓道之文辭之固不獲
則竊惟董邵南窮鄉之一寒士也不有韓昌黎一詩
夫誰知實行爲如此哉愧余無昌黎之筆不足以示
遠嗟夫係以銘銘曰

猗嗟哲士絳組非以道以師炳學以心矢鷦小之棲

用晦而明百世之筆而表公名

通訓大夫司憲府掌令龍浦李公墓碣銘并序

公諱濰字巨源號龍浦李氏系出驪州文節公行號
騎牛子最顯八 本朝四世諱迨翰林忤權奸退居
月淵至孫諱潤壽 贈京兆尹是爲公五世祖高祖
諱煥號湖憂薦學行除 王子師傅曾祖諱長發祖
諱鉉考諱之泰號默窩稱仁厚長者妣月城李氏秉
一女校理光胤玄孫 崇陵己酉公生性質清粹幼
見長者必下階拱手入學勤讀同隊嬉於側若無覩
成童聞李懶隱先生學有淵源負笈從之向上志作

箴以自警伯考書懶翁要做時工懶翁答資近道何
科白爲辛未上庠以先公命治經業壬午釋褐選槐
院乙酉除金泉丞載書赴不以務廢讀減驛奴婢貢
補馬直繕廨丙戌廉使誣罷歸己丑除葵樹丞壬
辰春陞典籍冬丁先公憂乙未春除金井丞驛凋
重以荒公撫摩蘇瘵蔡希庵彭胤寓近公餘與之日
哦己亥內艱戊申春除禮曹佐郎時逆變路梗公
強疾入京翌擬正言夏陞正郎秋除平安都事病
辭己酉秋除高山丞公以辭西辭北非分義強赴
時北大饑公捐捧丐公貨俾賴活高兼七邑教官公

謂人才何限遐邇文諭爲學之方士咸奮翌秋辭病
歸知縣朴弼基屬公敎學著講式月朔月半講校宮
江院癸丑冬以掌令召公病痢辭不允至嶺底又
疏辭尾陳天灾民饑收人心之本繼言聖學十圖體
認之功又曰聖質英明日開經筵道問學可謂至
矣大德敦化上些欠闕敢以立大本說獻辛酉春前
銜召陳老病難進狀附補君德遞不果上夏疾劇
謂侍者曰無佗念惟舊學了了喪具命視家豫庀使
從子檀書遺戒屬弟瀛治喪禮正枕席屬續享年七
十四壬戌六月二十八日也葬尚州鳳林山亥向原

公天資溫雅操履方嚴自從懶翁學懶翁盡心教誘
公承受數十年以小冊劄所聞切要之訓名曰晴窗
敬覽洛閩書未嘗離手出入常以心近隨聞先輩矜
式者就之如李孤山權荷塘門皆贅見自京歸枉道
謁丁徵君先生其得之言論風旨者多矣所與刮磨
皆端方經學之士雖以庭命習時文取科第宦念常
輕得閒卽專心進修晚專精中庸常曰一經得力佗
經迎刃而解事親色養至官郵異味必致不致不口
先公患欲手煎餌粥晝夜不解衣丁憂一夜頭鬚盡
白柴毀不支含禭自視中禮喪葬祭視家禮慘丘儀

取東儒論抄爲一書以便攷覽先妣喪年已耆盡制祭具潔篤友于弟教子姪義方在金井族舉子請印試紙責曰假印其不至欺君哉惇宗無間遠近於無依加卹處鄉悌鬻集諧笑滿坐或端默或看書不可否是非至義利分界甚嚴少飲醉先公呵終身節飲居官凡事爲久遠圖自處若卽日歸器用貨賄屬公物不支貸黃公沈謫北見公碑問驛人感然曰微公驛其墟家食未嘗書京雅曰吾何以姓名達之時貴眼李相台佐其子宗城相在郵時因公知晚年臺銜李相父子之頌而一不迹其門後生質業反復開示

手抄退陶論學書爲學者柯則爲文字理到有遺文
若干卷夫人密陽朴氏處士廷元女龍巖雲後事舅
姑奉賓祭配君子克誠敬公劬經夫人竭力資具公
之成就實賴內助生三男二女男襁有學行稠出後
稽女姜晚李世輔襁無子以稠子輝新後稠男輝大
輝新出女張趾祖申國珍稽男龍羽生員又以學行
稱女金甲東姜晚系子致肅李世輔男龜洛龜齡龜
禹龜明女李 嗚呼公少受賢師之旨濺知內外
之分使之登金門上玉堂其學足以陶世足以格非
而見闕當路棲邊殘郵沒世而无悶可勝歎哉惟其

子孫嗣學不墜家聲是所謂食報耳五代祀孫復九
懼公墓道無顯刻奉李訥隱光庭所撰狀來乞銘疇
睦非其人辭謝責以世誼諒不可已按狀刪述而銘
銘曰

儒家之胄天賦之純賢師高足 明廷憲臣篤于問
學淡于祿仕任真隨分流行坎止蘊德韜光以適于
邱我筆無華曷以闡幽

禮曹佐郎三省齋趙公墓碣銘並序

公諱錫虎初諱錫均字正則號三省齋趙氏本豐壤
始祖高麗平章事孟入 本朝中樞院事諱崇始入

商五傳司贍直長諱禧始家川上六代祖諱靖世稱
黔澗先生諱稜生員號永慕庵諱啓胤諱涵諱觀經
是爲高曾祖考皆以行懿聞妣務安朴氏天楹女有
淑行早世繼妣安東權氏重斗女公朴氏出 英廟
甲辰五月五日公生受氣清明資性溫粹纔髻儀度
已成又穎悟大有才先公使就權江左萬學權公公
姨叔見而奇之曰此兒敏非蓬蒿人授經治舉業未
冠先公卒祖妣繼妣在堂家窶甚公承兩慈旨聲色
怡婉竭誠力供養弟妹幼撫摩恩愛因心權夫人亦
同仁均慈親族八其室雖四徒壁常見和氣藹如公

日先考之望偏慈之慰惟經業至窮老彌勵癸卯秋
始登甲科以揆花例拜奉常直長年晚陞六 除儀
曹郎翌年甲辰爲拜江左翁墓往西谷病染以閏三
月初十日臯復於客次葬三峯山先塋甲坐原後二
十三年丙寅遷奉龍潭古村西坐原公慈良耿介襟
韻炯然才器適於方圓言談辨於事情平生行已處
事便若坦道無一回互之情未嘗有不可向人言者
樂人樂憂人憂中心所存發見於面目故族戚知友
無不誠服六十年不見一人變其顏色對人言明白
爽剴若不能容其是非喧鬧處亦不之較長短只瞑

目莞爾而已是以公三從姪舊堂公狀公行而曰昔
曾子稱顏子曰犯而不校吾友嘗從事於斯矣小子
嘿識於平日侍燕之時公之大段難及處在犯不校
三字矣舊老豈欺我哉此實錄也噫以公之資才標
致颺臺省而上王堂事君必可以無隱論事當不失
其風裁矣迺遠駕而近稅晚翠而還萎遂使勤志苦
誠卒無所施豈非命耶恭人長水黃氏翼成公喜後
斗山女誠心愛物勤儉理家稱賢夫人後公十三年
歿寔勝長村北辛坐原一男一女男駿然女盧師文
駿然二子述儉述賢盧男某某述儉子惠榮述賢無

卷之三

三

男女金肇應惠榮子基纘女曹錫萬前正言基纘子
南柱惠榮奉舊翁及李剛齋承延所撰狀來屬余墓
銘曰世非無文而負位望者子一言是須亟謝非其
人不獲且念鄉井先契義不可已遂按狀序而銘銘
曰
犯而不校顏事曾教伊豈用力實由天得持此以歸
闕無所歛

通訓大夫行世子侍講院文學晬窩崔公墓

碣銘並序

我純翼間嶺之善有修潔寡遇之賢學士姓崔諱

昇羽初諱鴻羽字士達號睥窩全州人高麗侍中文
成公諱阿其鼻祖入本朝至長陵盛際有諱現
官王署長官贈二相學問文章爲時名臣學者稱
詔齋先生於公爲七世祖六世諱山輝蔭官府使策
寧社勲封完海君贈正卿以清白聞高祖諱體
乾曾祖諱斗樞祖諱壽仁生員號松湖連世行誼純
篤宜顯而室松齋公舉六丈夫子並中大小科稱鄉
邦之彥第三雲广公光璧貴推恩贈亞卿第四諱
光翊進士號聾睡齋是爲公考以德量爲士友所推
妣延安李氏息山萬敷孫士人之彬女生長顯閥淑

哲通義理閨闈式焉 英廟庚寅十一月初五日公
生幼穎異頭角見伯舅剛齋承延亟稱之甫成童才
逸發吐辭脫塵臼先輩吹獎無虛口乙卯進士公卒
居喪易戚備至癸亥上庠甲戌擢庭試堂后記事稱
旨例付槐院副正字擬實注戊寅除沁 殿別檢登
摩尼歷甲申燕尾多用古作庚辰陞 國子典籍尋
移主宗簿簿癸未拜憲府持平戊子錄弘文選未調
用壬辰拜春坊文學丁酉拜諫院正言戊戌又拜文
學皆不赴 憲廟辛丑十二月二十四日考終享年
七十二士林葬本府甌峯下坐乾原公櫟慈諒而裏

方峭性也冲曠乎其持襟也坦白乎其行已也世業
裕餘平生不歷知艱楚狀而濟物之心輕財之義根
於天賦自夫行於堂親出於朋儕飢寒甚婚葬愆者
捐施之俾賴雅志在丘壑嶺南北山水佳處先賢遺
蹟無不領略所居堂前有巖相對扁以雙品廣蓄經
史子集法書名畫庭圃列植嘉木家在里巷闐咽中
時見數點幽花澗有靜處之趣賓朋詩酒之外岸巾
扶杖日吟哦其間怡然自適見之翛然若出塵也至
其問學一邊縱未嘗標榜亦未嘗放過觀於其制行
之自中繩墨所著箴銘心性情理氣四七等圖說次

陶山十八絕寓慕之作而則其所立可見噫釋褐三十年前後歷官不過六七冷漫晚被館選若通而復塞朝野有識夫孰不爲歎惜也於其室虛一間以拜北扁之日北向晨拜非大病患未或廢其一念戀君如此而卒之平日學業無一可措於經幄之間表裏皎皎之心事只得寓於靜居幽獨之地豈非命哉所著晬窩稿刊行于世前配義城金氏弘文修撰熙稷女副提學開巖宇宏后繼配善山金氏士人應久女文簡公久庵就文后壺儀稱順有二男三女男長雲應進士八爲伯父花隱公成羽后次雲璜女適

李秀鷺蔡東奭鄭來麟餘男雲璫雲璣女李晚恩許
祐武科槍劒哨官雲應嗣子健植女李能岵金遠銖
李晚協雲璫嗣子冕植女姜塗進士李中海申鏞浩
李男敦曦蔡男定默參奉女韓赫愚進士鄭男思容
雲璫男蓮植女李駿九雲璣男恆植女金翊永健植
男炳燮炳甲餘幼冕植男女俱幼冕植奉公家狀過
余溪上請爲墓石之銘曰吾先人事惟執事表白是
以屬疇睦跪而對曰公嘗敬我王考疇睦獲拜牀下
承眷亦不淺退而歎善之多賢自古爲名鄉而其尚
有遺風如是哉不揆文拙而敬諾按狀無非孺染於

前日耳目者所未詳處補以已所見係以銘銘曰
名鄉之秀天賦之具行由世篤志則賢慕有對龍墀
始若有爲遂闕長駕而命之畸惟其不羸後必昌而
撮其始末爲此甌碑

容膝軒趙公墓碣銘並序

公諱振胤字叔起姓趙氏本豐壤高麗平章事諱孟
后大提學諱炎暉舍人諱瑞廷最顯高祖諱光憲孝
謹聞 贈左承旨曾祖諱靖以篤行實學薦爲郎擢
文科黻直官不顯 贈吏曹參判世稱黔澗先生祖
諱基遠號樵隱學薦爲教蒙官止縣監考諱執明

公不仕妣南陽洪氏忠貞公應后忠義衛勸女崇
禎乙亥公生幼有至性三歲母夫人患乳輒辭吮成
童已文藝名進退法小學長拜睂安許文正受五禮
儀與丁愚潭時翰權南谷璿許知縣翊諸賢爲道義
交以季父縣監公命受雲谷世莊莊有松竹成林構
小茅扁容膝特書大明日月崇禎山川八字于壁好
讀春秋手抄明史一冊以寓匪風下泉之思自少不
事舉業作詩自警曰學孔宗周祖述堯何須干祿利
雖刀訓子詩曰存心修行義明體整冠裳用工尤精
於禮時聖廟新躋位版與舊位版分寸差殊 朝家

命一例改版公草疏與同志議陳卡事寢已李游齋
玄錫按道禮於廬公請行大同均惠法節目詳悉晚
年立書齋積聖賢書與伯仲諸公逍遙吟哢怡養性
靈超然不累於世扁其齋曰聽澗亭以己丑十一月
二十七日卒壽七十五葬黑石亥坐原配永川李氏
參判民寅孫廷櫛女著靈宜先公十二年終後遷祔
公兆生三男一女男彥琦彥軾彥轍女權震琦孫學
經達經述經迪經致經緯經亨經子姓繁衍曾玄以
下不盡錄惟主祀學經子錫一錫一嗣子濯洙濯洙
子穗文科左副承旨穗子鉉冀鉉冀子在九進士文

科今正言公天分甚高濟以學力事親色養備至雖
時食微物未及進不嘗食性喜酒承親戒不復近喪
哀毀踰禮忌日祈寒沐浴齋素篤老猶然常痛早孤
誦蓼莪詩著愼終說終身孺慕處兄弟友敬教子姪
義方嘗曰人須安分纔不安分便失身又曰爲學只
要做持敬窒慾工夫大山翁嘗撰公蹟稱公文行重
於世此足以不朽公矣公七世孫諫院君在九將治
碣旻趙尚書尚鎮所撰誌來請銘顧鄉里後生習聞
公事行文雖短宜毋讓遂爲銘銘曰

孝友行於家文行重於世大義其惟尊周嗚呼以是

而全歸公又何求

孝子

贈宗簿寺主簿善山金公墓碣銘

並序

公姓金氏諱蘭卿字德馨鼻祖瑄述佐麗祖官侍中
謚莊烈封海平君貫焉後因朝令以海屬善山遂
爲善山人有諱銖號松亭入本朝官禮曹判書與

李陶隱友善生諱福尚官漢城尹吉治隱先生鄰居
相琢磨孫諱英發號習文堂文科官府使建學授徒
邑之儒教興於公爲六世祖曾祖諱壽完副司直祖
諱世義部將始居軍威考諱廷寶孝聞除珍原縣
監妣昌原孔氏某之女嘉靖辛亥公生其幼縣監

公遊宦公從李松塲軫李南溪輔學被獎誘事父母
至誠致養壬難負母避縣東度不能走脫衣帶出入
荆棘血遍體道遇賊賊見其傷感其誠反遺米去已
而佗賊又來索將加害公乞代母死子靈乞代父死
賊嗟歎爲指避兵之所奉二親孥家屬轉之間韶之
蘇野癸巳縣監公還本縣博陀寺母夫人仍在蘇兩
親並遭癘公日夜於考公牀爐畔不少休遭大故蘇
患未及報考喪翌夜忽感夢靈斂已往其日母夫人
喪出哭擗幾絕亂離峽居喪無以返靈欲假殯待難
定公曰殯而吾死葬其返乎乃躬負殯草宿三日至

博陀山峻哀悻氣不續難進有僧哀而代之備棺槨
如禮合考妣窆廬墓毀疾劇明年甲午四月十二日
卒年四十四葬左故山坐卯原李松塢爲備棺邑宰
蔡公慶先歎負母廬墓事定葬地助需給丁趙宰浩
諭于鄉曰金蘭卿孝行江革負母何子平營葬何以
加此况其師承淵源有不可誣因鄉儒李公忠可等
報申狀臬司聞之朝 天啓壬戌 贈水部員外

崇禎癸酉加

贈宗簿主簿配八莒都氏主簿應斗

女後塲葬公墓南麓一子卽靈生員號警齋學行稱

三孫宗亮弘亮東亮宗亮

贈軍資正子夏鼎九鼎

贈刊議弘亮子象鼎東亮直長子禧鼎時鼎玄孫
以下不載嗚呼公之孝根於天性也致敬達禮倫則
整然造次顛沛必於是是則感於賊虜發於宵寐者
其非至誠之所在乎宜其先德有自賢子嗣世不墜
家聲其永有賴也夫無位而年不永此雖後人之嗟
君子不論也銘曰

此惟故孝子善山金公之藏戒樵牧勿傷傷孝子不
祥

處士豐壤趙公墓碣銘並序

趙君秀榮袖一紙書謁余曰此吾先人家狀草記也

先人不顯於世執事鄉人知吾先人事願得執事言
以爲不朽圖余辭不獲迺發狀公諱述德字潤之後
改諱棧趙氏系出豐壤始祖諱孟高麗侍中至諱崇
八本朝官商議歷七世諱靖官正贈天官亞卿
卽黔澗先生於公間八代也曾祖諱緯經號麓齋以
篤行稱祖諱錫華有隱德考諱衡然妣延安丞氏光
王之女松塢軫之后著壹宣公生元陵甲午三月
初七日卒景陵丁酉二月二十八日享年六十四
葬雲谷世居北麓庚向原公孝性天出行勤儉器宇
寬厚醇慤十歲陪母夫人往渭陽俸承先公訃見星

哭擬終事如成人至老常銜恤旣孤奉事大夫人四
十年極盡誠孝未嘗一違意受責輒下堂請槿凡事
不稟則不行丙子大夫人天年終公屢朔不解帶置
身於爐畔及大故絕而穌屢其卜兆行在途天雨夜
渡黑有虎先之至廬而去主祭祀致潔置祭器祭田
並及外祖母祭田於二弟友愛甚替事堂父不以
晚暮替伯舅嘗臨公家喪出公治喪禮甚備善於恤
施門親鄉鄰之窮乏者婚嫁喪葬鮮有不受其惠有
一知舊屢見施者歎歲遭艱無以空爲見公對公不
能言公心知而憾也自出穀賙之凡自奉泊如也噫

吾見世人幹理致家者多矣或不擇於貨悖者有之或不恤於情至者有之屢責則竭不報則撤惟公早孤家貧無以力焉而迺自樹立於養生喪死無憾之道能散而恆足惟務積德於人而一出於悃悃不在文具之間宜其子孫衆多皆有恆業而其才且顯亦將有徵於愈遠而愈大矣豈所謂好義惇善不言而躬行之君子人者非耶配長水黃氏百熙女青松沈氏聖文女咸昌金氏尚鐸女有三子四女女柳冕祚金斗樞黃出子啓榮沈出子建榮秀榮女李鍾沃鄭建愚金出啓榮四男在升在恆在東在民一女未行

建榮一男在教一女金右樞秀榮四男在旭餘幼二
女朴鍾淵金壽民柳無育金二男元直元中李無育
鄭一男幼在升三男一女在恆一男在東一女在民
一男並幼銘曰

之德之實古亦鮮匹我撮銘之于後徵斯

錦洲處士高公墓碣銘並序

高上庠聖謙脫其先公衰周歲將治碣受狀於雲山
李公彙載以狀屬疇睦銘敬發狀公事親盡養志之
方兩親日杖屨六房惟寢膳待公爲安少外適親有
疾公輒心動先兆至誠所發類此前後喪毀踰禮喪

葬祭奠既自以支子不得主則物必致潔以爲助爲之盡心隧衛儀物無所闕伯仲蚤世三兄在起居遊賞無不共每遇異味一或後自朝而晡未敢先親在應舉暨永感而遂已節於用然人有窮蹙來輒樂施歲飢錄濟門族貧者外有穀隨豐直成言不幾值旱歉願買人欲從時責退之其直爲往檢者私沒不問故莊所析園林還之宗家曰家廟四山非支子可干先妣針婢來公服役先妣沒婢老公納其直宗家嘗曰人於細微處必思辭受之義千駟萬鍾必當知所處矣凡於名利蓋泊如也不事檢束儀度峻整後進

起敬自幼資性沈靜秀出讀書文詞夙就成童已進
作者法已而向志力學請益於鄭魯庵必奎魯翁深
以遠大期獎少學於門先進歿五十年具祭需未嘗
一忘爲先世三溪溪亭月峯三賢立祠輯月翁稿繡
之梓卜鹿門樂土田山水老焉於門外別構一亭名
曰晚翠取之棣華晚晚之義也疾患外無日不聯牀
子姪列侍花木盈砌文字宴飲以至閨閤觀感人稱
柳河東小齋故事云藏書千卷以文學自娛一生用
工在曾傳也其文主理達尤長於詩意寄平遠凡於
星文地志陰陽卜筮律呂筭數者流舉旁通而不數

數蓋嘗手描天文圖中國山川圖及所製律呂河洛
先後天諸說究蹟甚精而如兵政徭役糴糴等書可
救時瘼山理辨釋教辨尤裨世教者也公臨化從容
無怛意子女在傍泣開眼責之曰何不靜而俟之公

生 健陵癸丑孟冬初吉卒 當寧戊午季冬七日

享年六十六己未孟春葬于鹿門東麓甲坐原遵遺

命也竊意以公之才之具向使獎拔及其身豈其所

立草草哉乃公之爲孝出於至性而劬經行義樂以

忘世悠然自得於閒居靜觀之中者爲不愧怍矣公

真可謂得其所志而守其所學者耳公諱夢贊字理

安高氏系出開城府高麗吏部尚書良敬公諱令臣
之後至諱士原八我 朝直提學有諱胤宗號三溪
以儒徵爲主簿又諱仁繼號月峯官司藝癸亥反正
後 除官不起於公爲七代祖曾祖諱師訥祖諱星
瑞考諱補寬弘有器度妣竺山全氏竺山君元發之
後士人某女繼妣清州鄭氏藥圃貞簡公之後處士
櫟女也公初配清州鄭氏芝軒士誠後左尹來成女
生一男一女後配高靈朴氏判書尚憲後士人志仁
女生三男二女長男卽聖謙女長李承九早歿前嫗
出男文謙致謙淑謙致謙歿女姜達永柳祐榮上庠

無男以文謙子子之幼三女趙在元進士鄭東憲一
未行致謙二男皆幼諸子皆好學將就上庠尤文雅
夙著高氏之慶其已乎疇睦以鄉後生嘗一登公門
獲賜甚厚而於庠胤公受知久且信雲翁筆今其所
以委重者非苟焉也宜不敢終讓敘而銘之銘曰
視其在內何必外求視其所學有懿厥修其昆方裕
厥蓄在躬我最銘之長者之風

盤溪李公墓碣銘

並序

公諱灞字幼清號盤溪李氏籍黃驪麗臺有諱行號
騎牛子大提學謚文節生諱述八 本朝藝文直學

生諱孜知敦寧爲讓寧大君壻歷二世諱師弼始居
密陽其後翰林號月淵諱迨左承旨今是堂諱光軫
於公爲本生七代六代祖高祖諱奎本生高祖諱炯
生員曾祖諱長胤祖諱萬成本生祖諱萬寂考諱之
迪無顯仕皆有名行妣平山申氏益喜女 肅宗庚
子公生幼穎悟稍長能自知刻苦讀書孝敬出於至
性辛酉丁先公憂哀毀幾滅性墓距家遠朔望展拜
未嘗闕痛未及終養事母夫人色養備至己卯遭艱
年衰執制猶不懈篤於友於宗族其睦厚加入與人
接和氣藹如村胥峽岷無不悅服爭鬭必質聽其曉

譬訟自止於窮餓尤存心隨濟簡重不妄交於鄙瑣
之類不肯與之狎昵所嘗與者皆一時名士也中年
已世念泊然雅好山水築室覺山石灘上曰盤溪溪
東峽勝地公於焉藏修而終老每當良辰治觴命儔
蕭散而自暢嘗有詩曰窈窕巖居不厭深一區山水
百年心於此可以觀公也 正廟庚申以大耄拜僉
知中樞公諸子設慶席太會親戚鄉黨以娛樂之人
以爲德善之報丁卯四月二十四日卒享年八十八
葬治南無量院後庚申移葬府東所月後麓甲坐原
配淑夫人月城崔氏龜錫女婦道甚備先公辛巳沒

墓附左有四男二女男穉秋穉穉女金圭武科李東
旭餘男祐穉穉男輝東輝奎輝泰秋男輝弼輝五女
宋洛奎朴廷夔盧某文某朴世直穉男輝翼女孫芝
秀穉嗣子輝奎女金珽鎰庶女宋赫餘不錄公事親
盡孝守制盡禮稟得之仁也奉先追遠友愛惇睦內
行之懿也絕意進取葆真林壑知守之正也和以接
人簡於交友儀度之肅也至其早知讀書長益專精
日用事爲不負所學則是又爲平生德業之本者也
權江左萬曰林壑雅趣南癡庵景義曰清簡寡欲習
尚超俗之數公詎無所見而云然哉噫公可謂孝友

清修之善士而壽秩而止竟不得有所施惜哉今於
其玄孫鍾寅之來請銘不容以不文辭謹撮而銘之
銘曰

儒素世篤惟黃驪族恪守遺風曰盤溪翁心得其仁
行備于身俯視寰塵獨返天真有寧幽宅有轟龜螭
我文雖拙公蹟可師

默軒李公墓碣銘

並序

我家君嘗撰月淵李公碣文及月淵臺記盛稱其世
德之懿山水之勝不肖嘗從傍承聞因得與其裔雲
章雲甫相識好其人文雅士聞其先五代祖默軒公

廢舉劬學自適於江湖間守名祖之業而享有清福
甚高之日章雲甫手默軒處士狀遠來託余以墓刻
受讀之作而曰公眞所謂稱其爲後於淵翁而爲主
於淵臺也凡係懿行勝迹君子所樂道也奚讓爲公
諱萬材字廈叔姓出黃驪太學士文節公騎牛諱行
最大傳五世諱迨翰林卽月淵曾祖諱慶沃正郎祖
諱瑜 贈參議考諱長新妣密陽朴氏處士倬女

顯廟辛亥公生聰穎異凡幼孤向學凝然有遠志宗
戚鄉鄰奇愛甚邑倅趙公見公秀而文以其兄之子
妻之趙從弟宰相某亢少可嘗敬公已卯魁別試字

掌覆試言君豈作寒士公謝曰公主司我對策非光明不舉宰及聞者歎尚又嘗入試園兩塾巾人化林宗故事既而歎曰舉文枉了實工遂廢舉卜居月淵東活水上佳處題默軒謝世究經爲涵養計抄朱書要語及東儒言行以資觀省奉祭盡誠禮以早孤不及養爲至痛日晨謁廟朝望焚香不廢處族問疾調窮憂樂與之同接人溫厚人無不充然如權荷塘簪雪李學諭諸公觴詠講義屬意甚重而蒼翁尤懇懇焉庚子十月十二日卒壽僅五十葬菊田負友原數郡來會配漢陽趙氏府使嗣雄女漢興君公瑾曾孫

一女適孫孝著繼配善山金氏

贈承旨文祥女崇

陽府院君信元玄孫三男之標之模之楷之標四男
澧洞澍浚之模一男漸之楷三男潢潤澱曾玄以下
不錄嗚呼公家世旣聞才行兼備苟志於世豈或無
夤緣而顧雅素丘壑遺外名利終其身不出於月淵
水石之鄉此其中必有所樂而風流韻致可謂無忝
於前人矣章雲甫之篤於先烈其有所來乎銘曰
不以其才而以其志脫灑終身先人山水身已志存
山水同只

竹軒崔公墓碣銘

並序

公諱慶十字士晉姓崔氏貫和順麗朝烏山君諱世
基其鼻祖八我朝簪組不絕有諱重洪觀察使於
公爲十世高祖諱東奎武科官訓鍊主簿戊申逆變
爲左督將爲矢石所傷卒曾祖諱萬祉祖諱應桓考
諱河大有孝行妣清風金氏致熙女婦德稱正廟
辛亥公生幼嶷穎學語已識字年十餘見嫗抱襁泣
問故曰兒衣薄寒公解衣與之曰寒不堪飢必甚挈
嫗歸潛裏送數斗米家人莫知辛未丁外艱喪禮一
遵禮制友愛篤兄弟食聯牀寢共被仲季公沒公養
其孤如已出長分田宅甚均自取荒頓族戚知故子

弟貧不能讀輒收置衣食之俾成就遠近士歸嚮恤
窮交寔族尤摯冠昏喪祭力不致者傾儲助壬午上
庠不復舉箕山下鑿池名洗耳潭潭下拓址手植數
畝竹號竹軒日與韻人學子釣詠徜徉於其間風韻
爽朗也丁巳公寢疾觀化前三日盥浴正衣冠謁廟
招子孫曰某日時余歸矣汝曹勤業勿陷不義泉下
瞑目矣語不及家事及期終十二月十九日也享年
六十七葬郡南龍井洞負西原配盆城金氏以錫女
先公歿公窆與之合生一男三女男希洙女鄭遠駿
裴東祚柳瑋希洙男昌洛昌文昌南女姜炯呂錫武

張潤相鄭遠駿男欽斗欽台欽永女呂錫烈裴東祚
男堇昶柳瑞男幼昌洛昌南俱雅謹有志尚嘗從余
問學日抱狀來請銘噫公以其植宜有所展拓而卒
乃窮約蕭散而終其世安分守身而全其歸蓋薄於
遇而厚於稟者也服訓勉學嗣立公門以承公未食
之報者其在後人歟是爲銘銘曰

隱約而終儒素之本色也不羸而遺善人之實德也
嗟斯人人莫知兮我作銘爲此悲也

芳山李公墓碣銘並序

岐城在南溟中嶺之屬邑也限以海士夫謫居之宜

其俗質顧篤行人往往出始知天之降生人才智無
間今見芳山李處士事爲之敬服彌日其立心制行
事親孝祭先誠睦於族義於鄉力學博覽筆法亦佳
是足爲倫彝儒業上人矣夫人之大節也外倫彝儒
業而他何所稱述也其可以窮處而小之哉斯足以
銘處士名慶禧字華益宗姓也分派始自 桓祖大
王世居京簪組蟬聯高祖承雲當丙丁訏以白衣散
財募兵將赴亂痛南漢下城哭三學士挈家蹈海隱
於濟三芳山下子孫遂爲濟之人曾祖再弘祖碩河
考重輝妣某貫某氏公生于丁卯終于壬寅八月十

三日得年僅三十六傷哉短也葬隱迹山甲坐之原
配金海金氏生一男男榮春榮春生芳成芳湖曾玄
以下不錄今其玄孫起源治公麗牲之石使其子殷
誼越海北來六百里託余以銘是亦知其所先務者
銘曰

天不限人地焉限之人在其中溟渤瀾瀾

溪堂先生文集卷之十四

墓誌銘

崇禎處士菊潭朴先生墓誌銘並序

先生諱壽春字景老號菊潭姓朴氏密陽人朴本出新羅王子密城大君麗季有諱文彬號桃隱謚文節與圃牧爲道義交是爲先生八代祖高祖諱亨達賢良科奉敎師畢齋友善寒蠹曾祖諱彥桂與靜庵先生友祖諱大成號安巖從晦齋先生遊考諱愼童蒙敎官遊退陶先生門退陶書與晚悟篤志四字公嘗號無盡齋夏以晚悟號卽佔畢以下五賢手帖家傳

往復於高曾祖考者也世德可徵妣密陽孫氏參奉
驚女隆慶壬申先生生有異質童幼若老成已能
知事親讀小學曰人道在此教官公奇之曰寒爺有
小學書中悟昨非之句畢翁稱作聖基兒有是語弱
冠丁龍蛇難家避青松染疫父母兄弟姊妹亡喪出
先生與崔姊幾危而獲全時兵火飢疫死相枕人煙
絕猛獸肆行先生行乞爲養跣負冰雪中不失時或
夜遇虎虎護行同路賴以免親病病猶泣祝天遭大
酷毀甚體顛躬負七喪坎客土雖糲菜必奠轉嶺東
不廢哀省途見未笄女失所哀之知非賤處之姊嚴

其別撥其父黨宰鄰歸之日以返葬爲心家無相或
勸以室愴然曰情事未伸丁酉倭再獒先生曰前不
死以親在今爲國死糾徒赴火旺郭忠翼陣亂定卽
運櫬附身棺極誠親知以馬牛助辭曰喪亂未能舉
親骸忍附馬牛背躬負歸五喪以次返去四百里遠
遠近感歎乃明年納婦卜居豐角山中爲塋近而林
壑邃也與從兄陽春共研究崔姊亂中失夫母事內
政一聽之自是謝世事嘗曰詞章非君子事又曰道
本在我何可捨此心之嚴師枉求諸拜寒岡鄭先生
問爲學大要又從旅軒張先生講理氣說兩先生甚

獎許豐碑俗賈以鹿規藍約訓迪以身率山俗趨禮
教訟不之官戊午 西宮幽廢先生草疏極言子無
讎母見者髮竦光海命勿捧作詩歎曰 西宮門閉
彝倫斃北闕雲濛日月昏密鄉重建申松溪間碑鄭
造按闌使受陝弘文其文醜詆晦退衆皆怵先生袖
文投辭不饒弘造亦無以罄碑遂已丙子翟大八先
生倡義聞下城題壁曰八山甘作 崇禎士處世羞
爲丙子民八山終世以 崇禎處士稱性好施歲儉
私賑賴活幾千人年德俱邵鄉鄰歸仰東南冠蓋無
不禮其廬人謂山林宰相云 孝廟壬辰十一月五

日考終壽八十一甲者如哭私親葬密陽鳳泉麓丑
坐原 顯廟壬子 贈地部右侍郎先生天稟篤實
受訓家庭專用心於內而涵濡於師門故自存諸中
以至行於身而接於物者一以真誠爲本慎獨守約
老而靡懈平居退讓若無所能而中蘊陽剛發無疑
難事無大小遇之沛然至於名利之私寵辱之來泊
然不爲意毅然不可奪卽其全恩之疏碑文之擲題
壁之詩聞其風者亦可以灑然而起頑懦則其有補
於世教豈淺尠哉噫德在躬而終老於竅巖有先憂
無後樂而冲挹以沒世一係於時一存乎命嗚呼希

矣所著有讀書指南學問類解道統源流錄東方學
問淵源錄疑禮見解追先錄及詩若文如干藏于家
夫人月城金氏教官遇鎔女稱壺宜二子璫 贈參
判璫 贈左承旨五女成昌遠辛時望 贈佐郎安
通漢李長胤李而楨璫子振翰兵使女郭世翼司藝
璫子振珩 贈大憲振翮及第女金日章安晰宋國
輔振翰子孟徵直長仲徵府使振珩子奎徵及第夢
徵泰徵郡守聖徵同知振翮子箕徵庶出珪僉知子
孫蕃衍不盡錄八代孫致奎與姪著永以文集追先
錄北來託誌文於疇睦顧生晚學陋何足以知先生

盛德懿行之萬之一蓋於寒旅淵源之錄澗松趙公
之狀蒼雪權公之碣夙有所承聞近與其賢孫致奎
甫雅賢孫之知不佞人微不足取信於人而猶見屬
者爲記其實謹撮其大係以銘銘曰

爲親竭誠爲子孝爲賢尊衛爲道正引君當道爲臣
忠節義以爲之質經學以爲之文隱居以終躬克篤
前列以遺子姓盛德之厚澤流無竟華山兮磅礴清
洛環其側我銘其竈是惟先生之宅

嘉善大夫三道水軍統制使錦浦金公墓誌銘

並序

河陽縣南河洞後交巳之麓故嘉善大夫三道水軍
統制使金公之墓在焉弘文提學南谷權公璫銘其
墓道大筆也宜無庸後人述也來雲以護壙之文闕
不可來屬余不敢以不文辭按公諱是聲字聞遠號
錦浦道州人高麗元臣英憲公之岱後後世敦勇校
尉諱忠臣徙家河陽是爲公高祖曾祖諱應珠主簿
祖諱瑩考諱四行同樞以公貴俱 贈如例妣平山
申氏壬難倡義官府使海女亦高麗元臣壯節公崇
謙後公生 萬曆壬寅幼瑰偉有器局羣兒皆讐伏
纔學聰穎善解讀史至關公明燭處斂衽唐宗家事

掩卷成童從師力學甚得稱譽性至孝事親適志物
參判公喜客爲亭湖上要親朋讌娛戊辰內艱辛未
外憂毀幾絕居喪以禮 國家自丁卯屬西陲屢警
人知其朝夕有難公曰生此世徒文奚爲適任校以
事撻吏被吏誣受辱遂憤惋投筆丙子登別科選爲
籌司郎丁丑 昭顯質藩選扈從多規避公以武僚
翊贊隨每胡使至從班皆驚出迎公獨巍然自持
昭顯愛金鸚 孝廟觀猿戲輒諫止杖宮奴與胡互
市者已卯東還 除虎賁郎庚辰拜黃州判官唐船
漂到境公曰忍執上國人與虜坐罷甲申拜龍川府

使兩大虎積害人莫能除公手射並殪之上賜表

裏孝廟時龍潛親寫賜詩曰龍川太守病初起

射殺山中雙猛虎歸來卸馬擲弓韜長嘯三夏怒髮

豎自在瀋陽受知渙也乙酉陞通政拜江界府使丙

戌陞洪清水使繡褱別諭丁亥內遷行首宣傳戊子

拜南闕前誣吏懼欲逃公使諭曰無爾吾不事恩讎

壬辰陞嘉善拜會寧府使乙未入爲訓練都正丙申

大閱春塘臺公年老尚彎強射遠上曰鑠鑠特

除北闕旋拜捕盜大將顯廟壬寅除統制使甲

辰除禁軍別將乙巳移春川府使老病遞丙辰九

月二十二日卒享年七十五 上別致賻弔祭媿道
安李氏利川徐氏葬同原一男宇振蔭縣監三女朴
崇煥李行教張宇鼎庶子河振武縣監海振女李壽
敏察訪柳潭僉使宇振以從弟縣監景振子天資嗣
孫曾以下不盡錄公雖從武舉書冊至老死不去手
以此能知以義裁處遭時艱危則雪窖旌落衛諫盡
分莅制州閫則戢猾起瘵卒鍊廩羨八將出統則宦
成名立休有令聞謝事家居則賢朋老伴常歡然滿
坐而子弟侍側凜如也其在江界拜李文元祠葺院
宇增學田會寧統營設塾課士宋同春記統塾事云

又於統爲李忠武碑于露梁延忠烈祠 額是可書
也來請文者其八代孫洛奎遂敘而銘銘曰

英憲之世世有嗣興公迺挺生頭角楞楞沈雄之略
魁傑之器義炳尊周忠捍 儲嗣天南地北一身鎖
鑰隨著名績岷堵晏若受知 聖君尤光慎擇內掌
戎務門有戟槩出制三海龍虎旌節伊其大處詩書
卻穀湖山雲水青蓑倚杖歸視其人舊日宿將達識
遐觀身全名完銘以昭之垂億无刊

惺齋趙公墓誌銘並序

公諱濯洙初諱秀然字君實號惺齋姓趙氏系出豐

壤鼻祖孟麗侍中八 本朝有諱瑞廷官舍人有諱
靖號黔澗薦學行官太常正 贈天官亞卿是生諱
基遠號樵隱學薦官敎官止縣監於公間六世高祖
諱振胤號容膝軒遊睂相門以文行見重曾祖諱彥
琦祖諱學經號雲谷薦學行權清臺李大山嘗推之
考諱錫一生考諱錫玉以筆法名妣南陽洪氏忠貞
公應后起祖女本生妣全州李氏中山君演曾孫時
聖女俱稱女士 英廟辛未十月公生幼有異質生
考未經痘公常見李夫人聚青魚白腸問故言利於
未痘自是如其爲庚辰生考邁痘危公甫十歲能知

避痘忌時竊寒母夫人日浴祈神公亦浴且拜終始不懈得指日復人皆謂孝感公羸瘁食與藥盡器大夫人言憎汝病愛汝食公言雖厭苦柰父母憂何公獨身承宗事兩庭生考患飮嘗糞斷指祈寒夜沐禱天經年丁憂櫛奠不歉於心不解衰無時哭鄰里莫不沾襟母夫人憂其毀心制後勸肉汁曰汝素吾亦素黽勉而順繼遭母喪哀毀幾滅性家計喪禍餘被水蕩析內無主饋供於婢衣以貫未嘗減性於喪祭竭力又早喪室及長婦喪以家宅不吉毀之無以家或澗亭而齋庵也人不堪其苦恬如也遇忌辰自初

昏衣冠坐待鷄鳴家有數畝農作作米封一積並果
菜曰臨祭稱貸窘辦與不祭同雖絕火所封自在喪
中族子姪授教者十數雖恩擾未或間屢空也猶引
進胤公稟謝遣嚴教曰此輩失學門戶何居常靜坐
讀四書心近春秋綱目手又抄寫備便覽一畫不放
過遊大山門大山書勉曰近日所工想有用心處只
在自家著力子弟侍三十年未嘗見不對冊之日教
子弟曰聖賢書不可暫離困窮患難尤不可不讀嘗
以本生未立祀爲痛長胤承宣公釋褐教立祀事掩
抑泣視服盡如一室公若患恙遠近親來診日夜執

卷之三

煎餌熬慮若親子姪癸亥十一月十二日終壽五十
三始葬云谷村後二十四年丙戌移窆青南水晶堂
後乾坐原公慈諒清介敦厚周信治家和嚴御下恩
威待人盡忠款見善若已出見惡尤浼如族兄舊堂
公曰有文有修行將有得實錄也少以親命隸舉業
自孤苦謝公車每以門戶責教督承宣公卒有所成
立嘗錄先賢事蹟諸家禮說著東林談聞並遺稿藏
于家配孺人禮安金氏絰女郡守南一曾孫貞淑無
違德兩庭無間言年三十九沒有二男長櫛卽承宣
公次栢承宣男鉉冀鉉榮女金鎮範李萬儉側出遇

榮桐男進榮達榮女徐重輔金元弼鉉冀男在九並
中司馬文科見方出入臺閣在鳳女李柄觀餘幼鉉
榮進榮子女幼嗚呼以公操履見識憂懷貧窮以坎
壈而又無壽天所以報施於後者其在斯歟在九奉
承宣公所撰家狀以鄉後生知公德善來屬誌辭不
獲就狀次一二係之銘銘曰
不積焉發不發焉述我觀其述得公之實

同知中樞府事白堃黃公墓誌銘

並序

上之四年冬同樞八十歲老人白堃黃公卒公諱中
慎字謹之號白堃貫昌原上祖諱石柱高麗大相八

卷之四

九

我朝諱驪奉禮以哲識保家三世諱士佑貳相號

慵軒諱應奎同敦號松澗遊陶山門諱暹大憲謚貞

翼號息菴穆陵末見幾不及禍歷四世諱埒贈

僕正諱浩大贈吏議諱耆漢贈吏參是為公會

祖祖若考追榮以公資也妣全州柳氏岐峯復起後

士人通休女有賢德正廟戊申四月十四日公生

天稟異凡幼時人或誘翫嗜物不顧弱冠承家飭幹

有理取予非其義者微末或苟為文去陳務簡筆法

遒勁於古籍淹博旁通疾惡若讎不能容忍然怨者

亦希性度坦易而容儀矜莊衣冠真率而規法謹拙

甲申赴省闈屈遂沒廢舉己酉子仁夏釋褐丁巳以
侍從父推恩例拜副護軍僉知中樞五衛將丁卯
陞嘉善晉同樞公晚喜草朱子所訂參同契晝讀
夜誦十二月十日終以明年三月二十四日葬于殷
豐梓村壬坐之原配贈貞夫人宣城金氏柏巖功
後承旨若鍊女孫先公沒一子卽仁夏歷王堂前承
旨女適金翊永孫在英在薰曾孫幼嗚呼公生稟剛
方嚴正之氣躬篤孝友忠信之行平生惟無機心不
失赤子心之大人也不以問學自居所作爲隱然皆
稽古之力是宜承宣榮孝之奉兩至胤孫文學之望

方蔚耳疇睦數次造公第瞻仰承誨今九原矣安可
作哉謹撮狀爲銘銘曰

競機而今公赤子心常激勵者丈夫亦我公可謂浚
有得於鄒孟氏之訓斯質撰刻恐淺

通政大夫承政院左副承旨兼 經筵參贊官

春秋館修撰官致齋趙公墓誌銘 並序

吾商自古儒賢若賢大夫往往輩出最稱名鄉以疇
睦近聞而親見 正純之世又其一番輩出而致齋
趙公亦賢大夫已按公諱德字希大致齋號也趙氏
豐壤人始祖高麗平章事孟八 本朝諱瑞廷官舍

人諱靖號黔澗薦學行官太常正 贈吏曹參判是
爲公八代祖曾祖諱學經雲谷處士祖諱錫一考諱
濯洙有文行號惺齋妣禮安金氏文節公淡后絰女
英廟癸巳十月公生幼岐嶷強記八歲惺考拈韻
對山戴青天立水磨白石流族叔舊堂公曰此兒大
吾門成童遍讀小學子史戊申赴試見百錢遺召郎
人拾少頃索索者掌試從者卽證公事索者感請關
節公曰試非囑可得况藉汝手乎其言尚傳誦辛亥
丙艱哀毀盡誠禮服闋連大小解公以程文已就稟
明經亦學問事遂兼業惺考患瘡有年禱天斷指靡

不極辛酉釋褐崔寧春獻重賀得人冬入槐院權知
正字壬戌堂后入侍記對甚稱上嘉獎賞賚有
加異數也癸亥丁外憂送終終制如家禮杜門爲爲
已學庚午典籍肇慶令癸酉監察正言長銓趙公尚
鎮舉翰閣並擬丙子持平正言文兼庚辰直講獻納
持平疏辭辛巳獻納癸未出守梁山書處官如家視
民如子上不負國下不辱已於座右金海人要營囑
訟鹽田公詳簿得情報營曲金乙酉遞歸以祿不逮
養爲痛行考公緬襲斂文繡如初喪儀撰誌刻石納
壙趙巡相寅永行過公見處幽垆讀朱書歎曰此實

學清福丁亥獻納掌令不赴戊子擬瀛選枳己丑司
諫奉常正左右通禮辛卯通政付軍銜敦寧都正疏
辭癸巳同副承旨不赴甲午左右副金尚書道根舉
擬曰嶺紳獨趙某不面姜岱重毀先賢祠版公呈文
罪岱重甚嚴徐巡相憙淳稱公辭嫻丙申甘文士移
文廟屬公聚縣士行鄉約鄉飲禮己亥赴賀班復
拜承宣病遞疏陳勉君德斥洋邪見阻止丁未工曹
參議不赴哲宗辛亥三月二十日考終壽七十九
葬某坐原三配星州呂氏鑑湖大老后弘翼女長水
黃氏厖村喜后德休女一男鉉冀一女金鎮範全州

李氏中山君演后周煥女一男東冀一女李晚儉庶
出遇榮鉉冀男在九大小科今正言存九東冀二男
二女男麟九鳴九女幼金无育李三女在九存九男
皆幼公簡重寡默絕去邊幅居鄉立朝直道自守未
嘗曲意求合不爲崖岸苟異雖家人燕處不言利祿
從宦八閩非公幹不出門卯申之暇不廢卷客至詩
碁語不及朝政李古溪彙寧稱君子人韓尚書鎮庭
語公長胤曰追想如先公儘長德立朝處身後生宜
法其見重如此居家和而栗奉先誠敬兩至嘗以安
貧爲儒者第一工夫服食居處務儉素接人恭處族

睦交友信莅民厚悉出恟悞潑懼先業或墜老采警
晨謁廟手書先儒箴訓作屏簇省覽晚年尤竭誠於
宗祠措辦之節或結社水石而逍遙也疾欲命長胤
誦敬齋箴歎曰少延準節要千讀命也汝曹卒業嘗
著扶正銘所纂朱書彙約及遺稿藏于家善儷誅詩
尤雅黃白下礮老稱公文讀濂洛紫陽書得力潑知
也嗚呼蹟公之終始豈非所謂賢大夫事行歟記昔
公來拜余王考隅坐望見公白晳長身風儀淳澹尚
亦知其爲長德之容也居然四十年矣今者諫垣君
在九以誌來屬顧事契之重有不可已遂敘而銘銘

曰

有文有行有官有壽行於文優官不壽副有孫而揚
有餘其遺公何有憾公實以之我撮而書大夫之蹟
納諸幽堂以永千百

從姑母淑夫人柳氏墓誌銘

並序

淑夫人柳氏籍豐山始祖諱伯麗恩賜及第至我

昭敬朝有諱成龍官上相謚文忠世稱西厓先生是

生諱祚舉遺逸官持平號修巖是生諱千之又舉遺

逸官掌令號漁隱世世以學問著名於夫人爲六世

祖曾祖諱聖魯

贈吏判祖諱光憲文科持平考諱

晉春出爲從叔父諱光濂後妣慶州孫氏愚齋仲暉
後士人星建女夫人以 純廟戊辰十二月二十五
日生性慈詳貞拙自兒時好施壬午母夫人兩兄喪
並出夫人奉考公備經艱苦夜必手檢房塋拾薪溫
之已丑歸昌原黃仁夏幼善已酉文科陞資爲承宣
夫人封淑夫人承宣入仕在京滫瀡幹理恃有賢助
其節爲制度纖悉無遺舅公常稱道之無已當祭前
期致誠潔將事夜未嘗寢起視星月卜早晏舅公嗜
酒每朝溫一盞酒進及家旁落必預料理不一日闕
舅公性嚴難於進諫夫人婉靜起敬感回者屢嘗教

二子曰子第之失是其母掩其過不使父早知防微
故也嚴於閨門內外之別強記絕人數十年陰晴事
變詳說如目前丁卯十二月二十一日不淑以明年
三月二十八日葬于鳳巖西坐之原二子在英在薰
諸孫幼在英以葬用誌手狀纍然抵疇睦曰先妣事
行執事所知葬期而石具執事文之余義不可辭讀
其狀曰實錄也讀書男子有士行者幾人况女子乎
女子之識解名者忽女工察絲枲者矇內訓其勤於
工而動合於訓者此誠今古難矣此惟我姑母其立
心制行庶幾乎茲撤狀爲銘銘曰

嗟淑夫人淑德淑人盡識其封以示後人

墓表

高麗典工總郎潘公墓表

嶺之醴泉郡之北十里龍山寺洞西坐有一大墓卽
高麗典工總郎潘公湯貴衣履之藏而夫人甫州林
氏合祔也一日其十七代孫在衡語疇睦曰先兆距
居不遠之地近子孫孱甚守護怠且世久遠闕識表
恐無以示諸後而警鄙俗念昔先父老爲總郎節孝
咸昌公三世葬表得石於興州昇致百餘里勤至矣
但未卽載文塵土中因循至此不肖輩謀所以繼先

志殖資多年今始得改治石具具其事本末敢以屬
疇睦誠敬君之追遠也不敢以不文辭謹按潘氏系
出巨濟始祖岳仕麗朝以功封岐城君岐巨濟舊號
也子孫因貫焉自岐城至總郎中間失傳卽今醴龍
之潘祖總郎總郎表德生年立朝事實文籍無徵無
得以攷然其歿在永樂乙未六月三日則攷其世麗
末國初耳醴泉誌云公居郡之金塘谷中進士仕至
判衛尉寺事典工總郎判衛尉寺事勝國官制也然
則意者公仕於麗而不仕於本朝歟公有一子濡
世所稱節孝先生以至孝並蒙旌贈又士林立祠

俎豆之就其後仕宦者孫混咸昌縣監提別提玄孫
涇司猛洙訓導內忠順衛泗司猛五代孫士洞習讀
六代孫灝主簿七代孫喜男直長秀男習讀八代孫
好義察訪聞人則忠孝旌閭儒學俎豆觀物堂冲文
詞筆法東洲潞其尤也祀孫則濡以下混孟江涇士
洞灝喜男夢壁滾振海世溢東漢澤龍達洙致相宗
瑩在恭應錫爲十八代也嗚呼今去總郎五百年其
來雲雖不能顯榮於世能世文學持門戶見稱於南
鄉以此較一時顯榮者爲難又能修舉十餘世未遑
之事使其始祖幽宅煥然復明於世而經紀如始葬

陽善人之食報其永有不昧者存而潘氏之慶其未
艾矣乎幹其事者十六代孫亨祚漢祚昌祚十七代
孫在學也

咸昌縣監潘公墓表

公諱混字失无傳潘氏巨濟人勝國岐城君諱岳其
鼻祖也中世逸自祖考典工總郎諱湧書爲中始祖
考諱濡八 本朝世稱節孝先生以至孝並蒙旌
贈又士林俎豆之母夫人三金氏林氏孫氏公歷官
見諸譜牒者只軍資監主簿咸昌縣監階承訓而已
其入仕以蔭也世居醴泉金塘谷公移居郡之高士

坪祖考公葬郡北龍山考公從葬公葬郡東甕井山
午向之原媿安東權氏縣監曜女合窆三子孟江仲
江季江曾孫以下不盡錄孫士洞習讀曾孫觀物堂
冲最著亦以忠孝旌閭享祠院今十六代孫應錫
主公墓祭幹石事者十四代孫宣祚漢祚昌祚十五
代孫在衡在學而來乞文者在衡也立石顛末並具
總郎公碣文中茲不贅只舉其略俾來人知

墓碣陰記

芸亭金先生墓碣陰記

嗚呼此芸亭金先生之墓也其碣文大山李公所撰

也先生十代十一代孫崑秀淵秀聲吳間嘗過疇睦
於溪居起而言曰先祖世系子孫事行大山之文已
具惟文之八石者主簡簡故舊遠燹逸堇存之蹟可
備一二記載者闕漏處或不能無是以藉手於執事
願子記其陰以補之疇睦瞿然而復曰竊覲碣文辭
約而意備無容更贅獨其子姓後出之科宦者添記
則宜若不必固辭迺謹就其子孫錄而徵之曾孫迪
司評號桃村遼生員號洛皋以文行見稱達僉正
贈參判遴參奉玄孫世俊生員號竹溪有文雅世胤
參奉世維進士世翼參奉始振同知中樞號菴庵以

忠孝 贈判書五代孫益謙文科郡守鼎夏生員奉
事孝 贈持平六代孫弘紀僉樞七代孫光澈進士
號龍岡以文章氣節爲時聞人克恭壽副護軍今諸
君績文皆有老成之譽金氏其未艾矣抑疇睦於是
乎重有所感者存林葛川盧蘇齋兩先生之孝擬曾
參賢方陳寔直取性情真之挽則其於志事潑知而
言之者實矣李蒼石先生之惜其藏用晦明之記厚
德篤行爲后溪金先生推重之文則其於韜晦也交
遊也述其行而闡幽者著矣李星湖先生之素位而
行以道殉身生而設教沒遺名無疆之狀則言行之

本末槩舉矣李大山之本立而道光實積而乎達之
銘丁海左之泊然無當世意隱居求志以沒齒之序
吾王考之至行懿德足以模範一世之跋則德學之
巨細畢載矣後之論先生之世而求先生之蘊者庶
乎其於此而徵之矣如疇後生蔑學安敢以昧識劣
辭僭有所論擬也哉然雖以疇之愚嘗誦先生自道
詩所謂平生所學無佗効只得逢人少面紅之句而
略有所窺斑於百世之下矣私竊論之先生之學專
用心於內從真實地著工夫自一身一心一言一行
必講其當然之理必得吾心所安既得吾心之所安

則沛然行去心與理會表裏一卒以是成德而純如也則是詩也豈非所謂不愧衾之銘也耶諸賢稱述之如右庸詎無所見而爲是也是爲記

木齋洪先生墓碣陰記

木齋洪先生葬始在醴泉郡治西太學士權霞溪愈爲之文未上石後憲廟辛丑醴泉之卜患水嚙六代祀孫宗標卜得吉於咸昌縣東之錢村世葬之原其原背辛面乙用十月癸巳啓先生墓丁酉迺士林相窆距肅廟乙卯之始葬爲一百六十八年也又二十年庚申宗標將樹石於墓道因霞文入之石先

生系歷若行治並載焉子孫見錄只及孫房而其幼
未及者今追補相勛子益龜生員泌龜女李世璿李
鼎厚李之翊姜致訥金相稷相晉子範龜禹龜生員
應龜進士世龜權壽元女李敏培李世瑗子允中達
中參奉學中參奉女權世長進士洪濟輔相賓子聖
龜履龜福龜相連子順龜寶龜得龜敬龜而曾玄以
下内外衣冠之盛文多石小不能附惟承宗爲世大
龜嗣子虎吉虎吉嗣子錫胤錫胤嗣子學淵學淵子
宗標宗標子斗燮科目則玄孫錫疇生員六代孫殷
標進士並遷竈立碣事略識爲陰記嗚呼先生淵源

朱退之正嫡也今去先生若是遠矣讀先生之書諒先生之道則可不知吾先生矣乎

西潭洪先生墓碣改豎識

維長陵甲子西潭先生洪公卒而葬八年壬申樂石具蒼石李先生所爲文在石石立距今上之七年庚午爲二百三十八年久遠石且不堅潤苔上字幾不辨雲裔居其鄉甚蕃縣出石美與之相咨惕伐治之改豎其八代孫範九以門老書命疇睦曰石完矣因蒼翁文子其敘改石顛末疇睦西厓之孫先生西厓之高足弟子何敢以不文已嗚呼先生以吾先

祖爲師以愚伏蒼石旅軒諸先生爲友吾先祖託意
嘗鄭重愚爺曰後學標準蒼翁曰終始植立誠有所
本其與旅老質禮又足徵焉而系歷蒼文備矣顧瞻
睦奚贅謹書其不朽者如此

完山崔公墓誌後識

崔公諱文羽字鳴瑞叔父雲广公慟其有才而無命
爲撰誌時公諸子並未成童子孫錄只書三男幼今
其三男長雲範有長德儀範士類甚重之娶西原鄭
必恭女無子女子季弟長子觀植仲雲錫進士出爲
雲广公子殿中公陽羽后娶縣監義城金宗壽女无

育繼娶晉山姜世昌女生二男二女男東植寅植女
李能魯金碩奎李雲翼慟遺腹而生力課以書法名
娶右尹順天朴光錫女生四男二女男觀植八爲伯
父后華植坤植萬植女李在薰申夔協觀植五女無
子取坤植長子炳晟子之女李能宓吉民益洪夏謨
李永在一未行東植二女宋台浩金 寅植二子
幼華植一女申德兩坤植二子幼長承宗疇睦慈公
之甥女也嘗遊中表先進之間熟承公有過人之英
材令質弱冠之年製作已追作者典則亦能爲誠心
向學今於雲老之誌信然嗟呼雲老樂其有佳子姪

而湮空之者纔二十七歲不永于世而而不得真積
力久以充其量則顧安所不爲之繁唏傷歎記其不
幸短命之實俾遺其孤也竊恨夫胤子諸公咸能成
就而老死竅巖長孫觀植氏持文學世家今亦窮而
老矣天旣餉善於人則嗇之以富貴安樂者其物莫
兩全之理歟觀植氏以四片石刻之納之幽謂子孫
不及見錄於原誌將續錄而補闕屬疇睦識其後顧
疇睦文識淺短人品最下本不足以當傳後之筆湮
念親懿之重又感賢孫不彼之義略書敬足於誌文
之下而歸之如此

行狀

掌隸院司評逍遙堂朴先生行狀

先生姓朴氏諱河淡字應千系出新羅始祖勝國有諱彥孚封密城君爲貫自是世爲卿相而文翼公諱孝臣文孝公諱幹文憲公諱永均忠肅公諱翊其最顯忠肅仕麗至禮部侍郎我太祖龍興累徵不起後贈左議政號松隱世稱麗季八隱公其一也於先生爲高祖曾祖諱融號憂堂官天官正郎從圃隱鄭先生學祖諱乾號杜谷副司直自密城始家清道考諱承元號退巖亦副司直妣晉州河氏敬節公叔

溥女 皇明成化己亥九月先生生幼聰警才學語
見明字曰日月相對乃明之義就學端序則見戲嬉
陳禮容讀書知推究義理語默動止不苟聲聞已苑
然暨長務實學學日通識透聞解出人金東函駿孫
譬之子貢甲戌聞聽松成文貞公居廬有至行千里
往問之路露梁祭六臣墓其慕義尚節類此旁治舉
業而名韁非其志 中廟丙子上庠語太學諸生曰
成已成物自講學出爲學之本在誠敬誠敬之工先
正吾心吾心不正見得無實因作詩寄之己卯被賢
良選以親老不赴築室雲門山下訥淵上水石佳處

以逍遙扁其堂蕭散以自暢爲之記以見志略曰古
人逍遙未必在物外廣漠之鄉名教中自有樂地心
性體用之全理氣動靜之妙默契于方寸曲暢而旁
通焉所謂鳶飛魚躍光風霽月盡在此對山水驗太
極成象看花草想造物生意此吾逍遙之樂所以養
吾冲和之心金三足先生大有愚淵沿水下郭警齋
先生珣孔巖在水上皆數里日過從相許爲道義交
甲申除四山監役先是道臣上先生學行於朝曰
行擬丹閔學述程朱又啓曰居家著百行之源讀
書窮六經之蘊真儒林高蹈聖代逸民若待以優

禮林下隱遜必將相率而出矣於是命不就
乙酉拜司贍寺奉事不就戊子除掌隸院司評先
生以恩命連下謂世臣不敢效山野偃蹇行至中
路封疏還南冥曹先生見訪曰三徵不起何也先生
曰已分不可不量處不可強以爲仕也親老不可不
奉侍不可離以遠遊也南冥曰榮養亦孝一事此古
人所以奉檄而喜先生曰名利外物若浮沈宦海貽
親之憂何足爲榮已亥丁母夫人憂壬寅丁大人公
憂先生衰老居喪哀毀踰禮六年廬墓不脫衰絰不
迹廬外聞其禮者愈益賢之愛二弟怡怡嘗以池臺

奴婢付李弟自取礪礪教子姪諄諄以義方律身處鄉俱有箴戒雅性寬和易直喜怒憂樂不形於色視聽言動皆中乎禮所與遊皆一時名人碩德如朴松堂周慎齋申松溪郭警齋成聽松諸先生而三足南冥特其講磨之尤者也 嘉靖庚申先生年八十二寢疾命不邀醫進藥十一月十八日強起著家訓翌日考終明年春葬琵琶山七葉洞亥坐原始先生以雲門距郡治僻險民不便糴糴與足老議設社倉民賴之先生歿九年鄉人不忘其德立祠倉社傍後數年郡守黃公應奎聞而慕之以闡闡之側非妥靈之

卷之二十四

二十四

所乃移享立巖折公田以供祀卽仙巖書院也夫人
安東權氏司直穆女黃翼成公外裔也配君子無違
德先先生二十九年壬辰卒葬合祔有二男四女男
長穎 順陵參奉 贈參判以至孝聞先生歿廬墓
次頤 贈參判女長李興智次李郭次朴大榮次姜
慶崇餘男頤穎男慶延 贈參議慶新武科府使
贈參判慶因 贈持平女李碧頤男慶傳縣監 贈
兵曹判書慶胤 贈兵曹判書慶宣武科萬戶 贈
承旨慶俊女郭忠英李興智子得祿李郭子礎碑朴
大榮子而絢而立女文協牧使李春元鄭仁涵佐郎

姜慶崇女趙鵬僉使頌男慶蔓慶延男璵參奉璪以
參奉登武科虞侯瑀縣監 贈參議琬奉事珪佐郎
慶新男智男武科餘男哲男部將慶因男瑄老薦至
右尹慶傳男璵奉事 贈正郎璣出后慶胤男璘僉
正餘男球出后慶宣無嗣慶俊系子璣通政慶蔓系
子球判官玄孫以下不盡錄後當龍蛇孫曾之倡義
殉節錄功者十四人孫慶新慶因慶傳慶胤慶宣曾
孫璪瑀琬智男哲男瑄璘球並從曾孫進士瑾而其
殉烈者慶因慶宣瑀瑀又倡義錄功於适亂而死於
丙亂者也嗚呼此可見世德家風也恭惟晦退吾東

方程朱夫子也人皆尊信其道無二辭故其論人處
褒貶一出國論定矣文元曰惟務已施此盛德事文
純曰正學之文辭理俱到南冥聽松眼元少可而蒼
石桐溪亦豈苟爲言哉聽松歎其悅學南冥服其出
處蒼石玩遺躅而作詩以寓慕桐溪定行蹟於南冥
之師友斯至矣百世尚論無容改評耳蓋先生之學
洞見心性誠敬之源以孝悌下學爲基本溪懲己乙
斬伐之禍以韜名晦迹爲命脈其發於言爲動靜之
間者無非此意而其文稿燼於兵燹今其十一代孫
時默積年收拾並遺詩文附錄年譜僅成數冊雖不

足以盡先生所存所養其辭冲澹真率滾得陶邵遺
韻其言質慤平實不失洛建真詮此所以見重於諸
老先生者然歟時默甫可謂不負其家學也時默以
其手撰狀本及葛庵李先生所爲墓銘來屬狀行之
文於疇睦顧學識淺末何足以當是寄辭之被其強
謹就狀碣而參互隱括如此以俟立言君子刪正云
爾

濟州牧使李公行狀

公諱壽生姓李氏字逸當喬桐主醢虐退歸興陽以
終墓在尚州之東無量洞先兆左申坐表石毀於壬

燹其所記有無不可知世益遠事蹟沈沒莫有能尋
逐者十三代孫興基裒輯其雜出於邑誌家乘及文
簡公蒼石先生家牒四佳徐文正公佔畢金文簡先
生贈公遺詩可據以爲攷信者草出遺事一通使其
族弟敬基姪子貞奎北走七百餘里屬疇睦爲撰次
之役於是乎公之事行庶幾其有徵矣李氏出興陽
自高麗生員諱彥林始是爲公十世祖八世祖諱陽
升衛尉將軍高宗時破契丹立功竟殉節於渭州大
顯高祖諱吉文科封興陽君曾祖諱舒原文科八
本朝官左贊成祖諱垠文科壯元官大司憲考諱垠

門蔭進官全州府尹 光廟賜手書褒清白士林爲
建祠享之妣貞夫人星湖李氏雲峯監務粹之之女
公始配永川李氏繼配仁同張氏進士胤之女有二
男一女男希証之証文科掌令女權孟孫藝文提學
齊平公之証男孟茂瑞興府使仲茂縣監世茂孟茂
男承宗參奉繼宗郡守壬亂殉節仲茂男亨俊亨傑
世茂男仁天主簿玄孫以下不盡錄而來雲之居興
者甚繁亦皆持門戶守先業見稱此其善德之報也
商山誌曰公以武舉官至濟州牧赴州時佔畢齋送
之以詩詩見本集是則公之以武科進可知也家乘

曰公爲通政大夫昌原府使晉州濟州牧使燕山朝
退居興陽公與四佳佔畢相善前後赴官皆有贈詩
是則公通政以前之歷官不傳可知也文簡公家牒
曰濟牧與畢齋相善赴濟時有贈別詩之二老者當
世之鉅匠而儒宗也其亢少可不苟於言孰如二老
而公之取端於二老二老之推重於公亦豈無所見
而然哉今其詩有曰忠孝一生雙美具滿城冠蓋送
君行則其多少盡分於君臣父子之間而一時諸名
勝之遞筒酬唱以侑其樂可見也有曰聚落半隨龍
戶集溪山真似羽人居則其靜制簡御而古之所謂

吏隱可見也以其超邁之資卓異之操出而供世
之不如而遂值廢主駭機將萌則獨乃超然遠引晦
迹荒海沒齒而無悶此其非明哲者耶苟非精義入
神其何以辨之早而退之勇也是可以爲狀而傳諸
久遠矣謹就諸說粗加整齊如此

沙斤道察訪南溪康先生行狀

先生姓康氏諱應哲字明甫號南溪戴寧人高麗監
門衛上護軍諱迪純爲上祖其後安靖公諱得龍顯
八 本朝諱慮左正言是爲先生六世祖高祖諱繼
祖副司直曾祖諱琬沃川訓導祖諱淑 德陵參奉

考諱士敬

贈京兆右尹妣貞夫人星山李氏判書

自堅之孫府使後女

嘉靖壬戌九月先生生而

聰穎學語所視聽皆能強記三歲已學書寫字驚歎

人王母夫人嘗患恙不離側涕泣五歲承三考公命

書江山風月四大字字如斗見者稱神童蘇齋盧先

生詩以美之有人間丹鳳見天上石麟行之句鄉先

進諸彥步韻識跋成軸八歲從父老遊蘇湖有長老

吟綠楊千線禪命先生對卽應黃鳥一梭輕聲聞日

播是歲丁外憂執喪如成人十歲服闋姜相士尚按

嶺到觀水樓邀致適樵者船新泛中流呼韻使賦輒

對云割盡秋山一半青滿船橫載泛滄溟幾驚鷗鷺
煙波夢晚泊東吳落照明一時傳誦乙亥居內艱哀
毀幾滅性庚寅魁鄉解上庠遂絕意進取惟以進修
爲勉天性篤孝常以蚤孤爲至慟每日晨起謁廟朔
望參出入告祭祀一遵文公家禮王考妣諱日黻巾
素服以終事得異味貯爲祭用祭需皆躬檢齎割餘
謹置祭後處之以故雖孩兒聞其爲祭需不敢索王
丁奔竄山谷遇先忌雖蔬糲必潔薦未嘗廢至末年
病革子弟代行猶扶坐愴痛祭罷就臥人皆歎服稱
其追遠之誠居處服御自奉朴素正家法內外斬斬

教諸子義方甚嚴諸子皆以孝謹文學聞事姊如事
母養奉老不衰待族戚極其親親誘掖爲多接人處
事一誠不苟僕隸敬畏絕鄙倍之言鄰里觀感無鬪
鬨之習早從師友講論經禮人多就而質疑先生於
愚伏鄭先生姊壻也甚相敬重嘗與愚翁論並有喪
往復數四讀書究其旨義以正句讀讀孟子伯夷居
北海間文王作興章曰作文王作興伯夷興諺解以
文王作興絕句誤也後愚翁赴燕見陳童子利貞講
是章如公句絕還語門人李公元圭曰中原人非有
我人之音吐只以文義絕句童子必有所受南溪曾

以是解吾放過聽及見童子讀始服南溪見解高李
公記此語云辛亥嶺儒抗疏請五先正從祀聖廟先
生製其疏時陝弘新得志詆晦退潛士林削弘籍上
疏下賢誣討弘罪其文二本出先生手辭明而義正
淵嶽距家近外先祖樂止亭朴公遺址也稱水石之
勝佳辰先生每於此朋酒爲樂壬戌與愚伏蒼石諸
先生及金龍溪止男趙玄洲纘韓洪芸溪霽文會相
酬唱至今傳以爲淵嶽故事先生幽貞益晦名聞日
暢癸亥用薦除沙斤道察訪清慎自持每治事人
服其公臬繙以治最優先生屢狀辭闌以殘驛得人

若啓遞是欺君也不許甲子謝病歸南溪築室居
焉愚翁詩風月滿溪高枕臥紀實也甲戌春患風痺
乙亥五月二日考終享年七十四葬上草田先兆壬
坐之原士林享先生於淵嶽初配晉陽鄭氏贈左
贊成汝寬女无育再娶草溪下氏察訪懷璧女生一
男用侯進士三娶豐壤趙氏士人壽福女生三男二
女男用良號臥雲克紹家學從先生享淵院用正用
直號茅齋明公廢舉晦遁世以大明處士稱女進
士申震望朴致華用侯無子嗣灝女弘文應教姜汝
泉用良男虫濟濟女府使鄭后亮用正男虫灝八爲伯

父后淳用直男漣女鄭堯翊府尹孫萬雄洪道源申
震望男默曾玄以下不盡錄嗚呼自我先祖文忠公
莅州事執雉登門成德達材者蔚然並興如愚蒼省
沙諸賢是已而先生又其一也以先生通神之孝邁
倫之才依歸有所濟以力學其所成就必有華國經
時之需而竟不能一遇而展布則命也然其從祀辨
誣之章有足以衛道而善俗生而並武乎諸賢歿而
俎豆于鄉者學問之力不可誣也如是夫先生歿二
百有餘年未有狀行今其九代孫采魯采寅以臥雲
公及歸巖李公元禎所撰家狀碣銘來屬余爲狀疇

陸人微識淺何足以當是寄竊惟先生之學吾家淵源之所自出事契之重誼有所不可辭於是隳括撰次之以俟夫立言者刪正

通政大夫承政院右承旨兼 經筵參贊官春

秋館修撰官知製 教寒沙先生姜公行狀

公諱大遂初諱大進字學顏號秋澗晚又號寒沙靜

窩姜氏出晉陽高麗殷烈公民瞻爲顯祖其後七八

百年簪組不絕爲世望族至諱姬弼進士曰監察

贈亞憲諱仁壽曰判官 贈左代言諱世綽曰司諫

以論救漢陰李文翼公繫獄九年及 仁祖反正得

釋後 贈禮曹判書號慧庵諱翼文曰貞夫人陝川

李氏奉事得男之女是爲公高曾祖若考妣 穆陵

辛卯十一月乙丑公生自能讀文理曉鬯人莫不奇

之未弱冠嘗從先公遊京師泮試屢捷魁館官車五

山天輅大獎誨由是名聞日藉貴介子要與交不肯

庚戌並中司馬兩試壬子登增廣文科付成均權知

太學士欲薦入翰苑公聞之若浼太學士之薦史官

非古故也時朴健李惺等以臺官自請錄勲公極言

其無廉恥之小人狀勾徒已切齒癸丑拜 世子侍

講院說書尋陞司書仍拜司諫院正言甲寅又爲司

書正言兼司書時請殺永昌之論張甚桐溪鄭文簡
公上全恩疏觸主怒三司論以護逆禍不測人莫敢
救公以正言引避言鄭蘊扶綱常明是非三代後遺
直館儒閑潔趙德謙等疏請斬公曰不誅鄭蘊此姜
大遂之所以繼而益肆其無君護逆光海答姜黃口
小兒何足罪因論日文章攻斥始被削黜乙卯竟付
處淮陽吳忠湖長亦於其時以爭論得罪與公同被
竄其在淮刻苦勵行能得處困之正其來學者隨其
才成就之甚多人皆賢之仁弘同郡人也盜虛名遠
近士爭趨公亦以鄉後進嘗及其門語所親曰執拗

喜佞終大錯了弘聞之大憲抵書其門人曰江左以
禮判爲萬古誤國小人此姜氏子之說惑之也禮判
卽爾瞻也瞻見其書很怒甚於是贛庵公及公遂被
幽竄矣弘敗公嘗過郇破宅作詩文以見志而又以
爲同鄉後進及其門不宜於大僂之後對人語及未
嘗以示人癸亥改王公起廢初授寧邊判官未赴
遽自此歷官戶曹佐郎一禮刑工正郎一諫院正言
一司諫五憲府持平一掌令十一執義八春坊兼文
學一成均館直講一典籍二司成三司藝六弘文館
副修撰三修撰三副校理三校理三副應教一廣興

倉守一濟用監司僕寺軍器寺軍資監宗簿寺正皆
三四校書館校理亦一通政以上政院二爲同副一
爲左副二爲右兵曹二爲參議參知掌隸院二爲判
浚事 奉命則丁卯爲號召使從事官又嘗爲湖西
暗行御史補外則戊辰爲順天庚午呈病歸闕使請
罷 上命遞異數也壬申爲靈光癸酉召入玉堂戊
寅出南原己卯陞東萊辛巳遷晉州甲申尹東京丁
亥爲密陽丁外艱辛卯赴完山大尹爲大夫人養勉
也八邑爲政靜而簡廉白嚴明吏懷民安去後莫不
追思立石其辭不就者星州牧使禮工曹參議各再

知製教則常兼帶焉戊戌四月十九日感疾考終
於寢享年六十八遠邇無論知不知咸弔曰賢大夫
公矣葬宜寧洛西先兆次坐酉原校院莫不具文以
祭上遣官弔賻祭如儀初媿宗室寧堤君錫齡女
壺儀稱生一男徽衍早世寔積城紺岳南莘山乙坐
后媿星山李氏參奉穀女亦有婦德淑聞生一男三
女男徽萬女吏曹參判李堂揆參奉金庭翊郡守李
時格三媿延日鄭氏縣監暄女無育餘子徽潤官東
部主簿徽衍娶牧使李邦益女有二女府使鄭行百
監司朴鎮圭其壻無子子從父弟徽敏子受齊進士

徽萬娶社稷令鄭岐壽女有一女李筱其壻又無子
子徽敏子胤齊李有二男三女男玄錫禮曹判書玄
齡進士壯元縣令女金大藩趙十明金南採金有二
男二女男世選世逸女趙壽胤李纘李無後受齊子
祖烈胤齊四子趾殷世殷挺殷晚殷並以戊申難有
樹立名節 贈地部員外郎玄孫以下煩不盡錄而
疇睦高王母卽公曾孫佐郎公世殷之女亦參子孫
錄中公天性孝友資質英明其事親也色養備至晚
丁外憂居倚廬枕苫草食蔬食幾不能杖而事大夫
人適其意左右兄弟極湛樂供歡以終大夫人天年

而孺慕終其身及辛未臺諫追論贛庵枉誣已白事
持之急公乃瀝血爲疏歷舉先公見忤弘黨見誣崔
應虛李挺元等顛末甚悉上命推發啓臺諫其
事君也置經幄則論思當道八言地則隨闕匡
救理兵則釐軍幕據禮則爭喪制一時疏劄多出公
手而明白剴切有足以動上聽而傾百僚矣由是
長陵殊遇日隆凡有所注擬雖居末必受點而嫉
惡之心無所回撓不悅者衆進塗終貽公泊如也有
命必肅官遞卽發未嘗淹滯絕意干進都下一名
官爲之語曰前不過柳朴之門後不識延昇之宅者

此人也世以爲知言云丙子以後宦情益薄完尹歸
來晚隱揭壁而父喪中扶毀進參於山陵郊班應
旨上萬言披瀝於敬天修己者感激圖報蓋未嘗
斯須間也其爲學也問寢視饕之餘日對經傳按蹟
蘊奧尤喜讀易不知老之將至又慕朱子大全無不
融貫自夫立雪於旅軒張先生之門每仍王程晉
謁函文親承緒論開益甚多其爲文也應酬敏速辭
理俱到嘗以號召從事行到烏嶺撰出諭列邑文立
就而忠憤懇至愚伏鄭先生歎賞久之曰此真倚馬
才所著疏劄詩文若干卷藏于家最其丙丁大義論

上下篇見逸爲後學之所慨恨已尊賢則陝西迺寒
暄金先生一蠹鄭先生卜遊之地創伊淵宜春是退
陶李先生館室之鄉建德谷以安享之誨人則闢石
泉書齋俾居學徒而程督有序後進蔚然飭躬則贊
正考父鼎銘警心則揭張息叔座銘正俗則倣藍田
呂約而行之睦親則立內外族契以講之衣不近彩
食不兼味屢典大邑坐無完席不挾長不挾貴枉敵
以下必下堂而迎之居官處家苟非其義一芥不取
至其奉祭祀則尤誠禮備極飭閨門甚嚴教子弟以
義御僮僕以和夷攷其平生大致此真所謂無一事

不可對人言者嗚呼至矣竊嘗論之早丁昏亂危身
而扶忠中際 休明犯顏而論事及夫乾坤蕩覆南
漢下城則不復有意於當世矣位不稱其德施不盡
所蘊士林公誦莫不痛悼然其諫院引避之辭過椰
破宅之詩請勿入廟之劄丙丁大義之論明於日星
凜於霜雪斯文不墜正脈昭垂行將俟百世而不惑
則其所以行其所學而措諸大業者抑又何加焉公
之世距今遠矣始睂安許文正公爲碣銘而辭簡事
略公之仲胤公手草家狀藏在中行者頗得詳實今
其七代孫秉和氏使疇睦爲之狀雖疇睦識短文拙

追惟先人之自出顧念平日之慕仰又何敢必於辭
於是謹就家狀而序次之如右以俟立言者刪正云
爾

禮賓寺直長竹庵先生許公行狀

公諱景胤字士述許氏系出駕洛王有諱澄仕麗官
上卿三世諱彥龍八 本朝禮曹判書於公爲八世
祖曾祖諱仁壽訓導祖諱國楨進士師靜庵先生禍
作與太學生守 闕號哭隱不仕考諱世節參奉妣
江陵金氏判書璿女生考諱世敦參奉妣咸從魚氏
舍人松亭泳瘡子應星女 宣廟癸酉七月初七日

生公七歲問考公人道何先曰忠孝問何由曰學遂
請學考公大奇之授小學十一歲遭外艱居喪如老
成益篤向學綴句驚人壬辰倭猝至奉母避兵于咸
陽雲峯採拾爲養未嘗乏人服其孝聞賊掘首露王
陵募壯士間往築墳請體相梧里李文忠公轉聞
於朝行望祭難平申狀闡司增修陵制於所居構書
室題敬義字作銘揭警日冠帶潛心心近諸書造詣
益深遠近推重李畏齋厚慶韓鈞隱夢參時來講討
畏齋曰見道最精吾輩第一人公嘗與畏鈞論道夜
而曙鈞隱言今夜此會可做三代威儀乙巳嶺士請

五賢從祀 宣廟爲設庭試公陪疏至是參格朴岳
堅瑞龜賀詩誠通金石朝 丹陛運值風雲拜 聖
顏是行與桐溪鄭文簡公潑相識追隨不外出李文
忠公訪旅館戲曰宰相先屈可相尋終不往梧相愈
敬歷拜蓮峯李公蓮峯曰守身如處子於左右見之
始南冥曹先生愛金官山水神魚山下構亭爲講道
之所士林建書院燬于壬癸戊申與黃公世烈議重
建蒙額堂齋名號公裁定而享祀冠服遵寒岡先生
川谷儀取白鹿洞規及退陶老先生伊山院規揭壁
警諸生曰先生之學以太一爲宗和恆直方爲符克

治爲先冲漠爲本至如通都大市之訓尤切中吾輩
之病可交勉也鈞隱曰潛溪尊賢興學功大矣潛溪
公初號也李文忠公累薦行誼除順陵參奉不
就時仁弘持重名嗜利之徒爭趨公杜門弘使其徒
書曰一見仰山聲價百倍公嚴辭斥絕弘患迫絀無
不至處之泰然趙澗松任道亦避弘移居來訪公次
幽居韻以見志戊午廢論起仰屋流涕吟一絕布謠
悲漢主隧賦憶莊公近日多新聽吾生恨耳聰癸亥
改玉以遺逸特除禮賓寺直長梧里諸賢貽書
勸起公不應惟以訓後進爲事請業者日益衆丙子

虜大舉入寇 上被圍在南漢公泣曰主辱臣死豈
偷生時耶募義旅使子瀕姪演西赴難賈莊辦百石
米爲轉餉書戒曰忠之所存孝亦存勿念老父倍道
直上至烏嶺聞盟成罷還公痛哭八山縛小屋植梅
竹改號竹庵寓意也甲申 明統隆題詩山外都忘
甲子回柴扉不向世人開庭前一樹梅花老獨愛王
春去歲栽絕筆不作詩更不接人事居三歲丙戌七
月初五日終享年七十四葬府東中山負坤原公天
分高邁氣宇端確行不崖異而純實言不訐直而溫
雅晨起拜廟靜坐讀書物來而應推誠任真至義利

界分毅然自守有不可奪之操忌日誠禮備至牀器
果肉必躬親曰祭以豐腴爲耶精潔可矣窮交窶族
極力濟施不言朝廷得失邑守臧否門上題愛君憂
國帖以寓獻畝之忠衣食甚純儉屋室僅容膝誠子
孫曰古人安於淡素非故樂此心有所存外物自輕
嘗曰讀書要體認躬行若詳究而忽踐口耳也又曰
看文字須如猛將用兵鏖戰一陳如酷吏治獄到底
推勘不可貪務雜進反爲所困又曰始學工夫須靜
坐然徒兀然墮禪坑恆以六有提飭庶不蹉了於庸
學尤用力洛閩說如誦已言文辭瞻望華聞彌章官

守致禮學者仰德屹然任塵拂之望而值世昏亂優
遊林壑晚年收 召公老矣匈奴燹而封祖陵衰老而
急 國亂生長冥爺棲息之鄉尋理遺緒而擔斧直
前扶衛斯文當不讓於親炙諸君子也干戈瘡殘之
餘人不自謀公悶賢祠之鞠茂卽舊址定新規至今
金官之士粗知前修風範莫非公賜耳此非七歲人
道之問爲之權輿也哉最是梅花詩淒咽悲壯尚論
者言其操殆似西山之歌其心不愧東海之蹈云配
靈山辛氏縣監碑女墓府東農所良坐原有二男三
女長灝宣務郎次瀕女李重慶柳昔玘尹圭 贈承

旨灝一男時興灝二男時昌時亨一女辛碩文重慶
五男藹苾瑩菀蔭菀武科三女尹亨世裴槐梁漢
楨柳昔玘二男東耆東耆尹圭四男亨商 贈大司

憲亨震亨成亨天曾玄以下不盡錄其大小科者六

代孫東潞進士暉生員東曦孝 贈教官駿生員最

生員喻生員士代孫倂生員健生員恁進士儻生員

浦生員慘進士倥生員僖生員佐進士筮仕縣監八

代孫祿生員辰生員祚進士祐武科槍劒哨官裨生

員稷文科正言九代孫斌生員斌以其諸父兄命奉

星湖李公鶴棲柳公及其族祖默庵倂所撰誌碣家

狀授不佞曰謹以狀德請疇睦其人哉謝不獲則曰
先先生孝悌行於家忠信著於鄉其爲已之學白首
一日而做得來至如壬難衛陵丙訏送子建祠尊師
絕敦潔已何莫非實處功用而西宮梅花兩詩綱
常有賴而植而道益明顧不佞安得不以是而揚先
生也念昔余髫髻外恆齋公備執雉於吾王考門親炙
蓋屢年疇睦得以受眷承誨者未可一二舉今衰及
之追思恆公一事無非實一言無非勸人爲學者益
歎夫盛德之後有如是矣嗚呼斌乎其勉之謹就家
狀刪其大略爲之狀後之知德者其庶有考焉

梅隱宋公行狀

梅隱宋從仕郎公諱時振字士達治城君吉昌后鄒
溪先生希奎四世孫判事光啓號龍溪師事寒岡鄭
先生生員惟敬號省庵娶申松溪門四學焉文科正
字鉉以文學稱寔公父大父曾大父也外祖曹習讀
叔夏李僉樞喜男公李出也萬曆癸丑六月日生于
高山里第 長陵癸卯四月日葬于開寧扶桑西原
享世纔五十年公胚胎前光資質秀朗性度寬弘已
自孩提遊戲出凡兒旣就學才思彪蔚十二受論語
已解大義旅軒張先生見而愛之多有教誨十三龍

洪公下世攀擗號泣衣袖輒腐爛又自寬慰母氏撫
愛諸弟早失所怙家無受誨而李夫人性嚴有法度
少有放過不以辭色假借十五以先公遺命就金省
克李浣亭門受業痛念先訓恪承師教不敢少懈省
翁胤子縣監公珩公之妹壻而文獻之家尚又文獻
之邦輒欣然樂之乃移卜於磻溪追從士友以資警
益迨其暇而翱翔乎道院華山之間所與遊當世德
望如柳洗馬後章柳校理世鳴鄭諮議道應諸賢最
其敬重者也性純實無物欲於一切進取泊如也內
自省而外不求斂華趨實頽然如田夫野老晚返古

里構數椽茅於鳳巖泉石凝神正坐繙閱書冊少無
疲倦色每值良辰美景或登皋敘嘯臨流賦詩襟韻
冲澹翛然有出塵之想矣嘗以未及終養先公爲沒
身至慟忌日殫誠備需哭必盡哀旬望省墓雖風雨
不廢奉母夫人愛敬周至志體並適鄰里感化配安
岳李氏正郎後綱女貞順有婦德與公同原而異室
一男世徵五女進士呂林和進士李斗元參奉朴世
杰金鼎鉉金槃孫男煊燠燠女趙涵參奉餘不盡
錄嗚呼公以溫粹之姿生郇溪之門既有家學淵源
又資師友講習以畜其德惟其天稟之美固異於人

而學問之力亦不可誣矣公之一生事業都從隱晦
中做將去安分守拙遜迹林泉不好論辯如干記述
多棄而不蓄是以文字無傳志業事治亦無以表顯
於世則詎勝歎哉然韜晦公素志文字有無不足爲
公重輕今距公世且曠百有餘年茲後生奚足以模狀萬
一第觀公之歿也並時諸賢樂爲之弔諮議鄭公曰
巖軒尺雪裏執冊幾周旋孝友是資地純真自性天
歸巖李公元禎曰詩禮家聲舊金蘭世誼親逢場頻
倒衮襲馥幾傾困聽天張公應一曰吾之駐巖浦相
距不遠源源相見君我之相親何如今君之公安得

不濫痛也縣監金公珩曰敦朴其行通敏其才內實
剛方外自寬和嗚呼彼數君子皆以儒林老成不妄
許可苟無公之實德懿行豈可強爲鋪排阿其所好
哉此之言自足紀於後世亦不待疇睦而顯而公之
孫哲欽氏近從余游嘗告不佞曰以吾祖而迄未有
狀願得吾子一言使吾祖賴而不朽顧不佞不敢當
是寄第惟龍溪公之墓刻我王考述焉忠肅公之謚
祝我大人撰之則余獨於公之狀而辭乎哉茲敢不
揆僭妄按狀而序次如右以爲梅隱公行狀

舊菴李公行狀

公諱厚謙字子實號舊菴姓李氏慶州人羅初佐命
首勲沙梁部大人謁平其鼻祖也暨麗名碩相承爲
文獻大家入本朝有諱良石灘先生存吾姪錄
太宗朝衛社功官大冬官再傳諱末全中生進號桃
源學術爲世推與寒暄金先生同年契篤安相貞愍
友善常唱酬生諱宗幹薦官齋郎不起早卒孫襄敏
公甚期詡又嘗與忘機曹公漢輔爲道義交生諱熠
又薦官直長號杜谷是爲公五世祖高祖諱復性官
僉正壬難舉義著勞績事在郭忠翼公會盟錄中曾
祖諱明翼廢舉業祖諱挺善號三願堂以孝聞府伯

有獎諭文考諱厦構弱冠登庠從遊趙王川德隣權
蒼雪斗經有講磨同苦錄妣安東權氏士人聖時文
監司默庵應挺後後妣上洛金氏成佐女俱無育公
以從子入后生考諱厦楷妣昌寧曹氏士人夏英女
辛酉季冬公生幼穎悟七歲入學十二誦七書無錯
十四五文詞進有作者法鄉老過考公請見公既見
又請見文稱奇童癸酉丁內憂公時未成童毀踊踰
禮已卯庠公歿生考悲其有才無命命公後公以禮
部文到日受斬衰處變禮盡情文卒以善居喪聞府
南羅王廟古例兩丁享祝冊自京至有上諱公以

祝八廟大尹呂公必容顧公曰認御諱字音乎對曰
旬字音呂後舉考公字曰吾友誠有后肅廟諱韻
書有敦淳二音呂恐鄉儒不知以何音讀公不直言
字音援旬字對其倉卒周悉非少年率遽事故爲之
稱道旣長成已早大意早廢舉業嘗與鄭塤安萬陽
鄭麓安葵陽鄭鳴皋權鄭梅山重器權江左萬孫梅
湖德升討論經籍惟務踏著實地尤以急難爲心趙
靜庵先生後孫有謫疑川者來見公知其旅居酸厚
遇之又折簡知舊助其竄趙歸以家蓄唐畫謝公還
之民有僑隣偶被酒傷人幾死夜逃命投公付奴壁

之數朔方出惟一奴外竟無知者湖人有一見於旅
店者有事府病公往問又醫藥其死爲具衣棺殮發
丁羿護于其家聞者稱歎癸卯春感疾劇四月初四
日終享年四十三葬飛鶴山燕峴丁向原塋安誄曰
東都士無論子實交分淺濳曰斯文喪矣余於是益
知子實箴安曰東都士莫不交口曰君子哉若人其
實學可知己江左曰樸厚忠德梅山曰陳榻論文趣
夏長梅湖曰行仁數奇鳴皋曰面無今世態曾有故
人情李進士德標曰雅望嶠南推士擘之數公汗不
至阿其所好此足以徵公之實德矣其他數三百輓

祭推稱可略也公以近道之資爲餘力之學事親愉
如也兄弟湛如也奉先也嘗曰祭主敬不敬寧無祭
秋入取仂別儲爲祭供祭日達宵不寐致如在待朋
友也開心見款不設防畛彼有失不遽數惟徐以理
曉使臧獲也非大過不施楚臨事也審慎明斷未嘗
有欠闕至論古今得失及人物是非必究其本末無
容毫忽未盡使人聽之灑然姪弘禹最所愛者教曰
人受天地之中以生雖七尺軀負荷至重舉業是門
戶計然吾人事業豈期於小又曰人有五患一立志
不能堅二制行不能高三處事不能果四議論不能

悋活五行乎世而甘爲人下不能自伸也弘商遵公
訓遂爲文學士噫公雖以布衣終其孝友忠信之行
明達精確之識固已行於家達於鄉而又其見重於
當世名碩之間如此是不但爲一鄉之善士而已其
有裨於民彝世教者有不可以窮達論也媿鵠州申
氏察訪適道曾孫處士文錫女有三男一女男長基
稷服公喪毀而死有一子翼龍次弘胄弘源女適孫
喜耆孫曾以下多不錄六代孫擎日登文科見今歷
敝臺閣甚有士友聲譽日公之玄孫魯慶奉其從曾
祖弘商氏所撰家狀一通委來三百里屬余館居中

請爲狀行之文余非立言者屢控辭不獲謹依來狀
略加隱括以埃夫秉筆者刪潤如右

溪堂先生文集卷之十四



